

李文恭公遺集

李文恭公奏議卷十七目錄

湘陰李星沅石梧著

男概編次

榛 梲

江督

恭謝

頒賞福字摺子

酌擬捐納營把總甄別補缺章程摺子

甄別溧陽營都司傅萬選等摺子

李文恭公奏議

卷十七目錄

附奏察看江西二鎮才力片子

附奏拏獲河南商賈聽滋事案犯片子

奏報丙午綱淮北鹽課全清摺子

附奏淮北餘銀片子

揀員請補清河縣知縣摺子

候補知府審案出力請加鼓勵摺子

狼山鎮標游擊展限引

見摺子

附奏新調蘇松鎮總兵陸鳳翔恐難勝任片子
糧道押運九次給咨赴部引

見摺子

請將江甯縣范士義撤任另補摺子

劃撥兩淮積欠豫工息銀摺子

附奏兼轄河務擬俟海運就竣再行赴工片子

會籌淮南鹽務仍宜合力緝私摺子

整理江安綱食引地事宜摺子

附奏辦理南鹽力求庫貯商情兩無窒礙片子

夷目來省控訴現委藩司馳往覆查摺子

附奏嘆夷來省所過各隘情形片子

修建營署兵房動用錢文摺子

六塘河隄工丈尺銀數摺子

附奏嘆夷回帆情形片子

奏報夷船出江入海日期摺子

附奏夷目信件已交藩司帶至上海由道發還片子

上海安帖情形摺子

附奏辦理夷務情形片子

審擬官運夾私各員摺子

附奏淮北民販併納稅課片子

附奏請獎拏獲官運夾私各員片子

提督病未全愈懇

恩展假摺子

附奏藩司由上海帶犯回省片子

附奏委署淮安府知府片子

揀員升署浦口營都司摺子

附奏請放九江水師營守備片子

附奏運銅人員請借銀兩片子

應修官廳卡房等工估需銀款摺子

查閱沿江礮隄並籌備火藥鐵彈摺子

修造撥船估需銀款摺子

臚陳江蘇洋面情形摺子

附奏請卹水師額外張書言等片子

委勘旗營公租田畝酌議辦理摺子

揀員請署京口副將摺子

附奏運銅人員請借銀兩片子

揀員請署贛州鎮標游擊摺子

附奏暫緩出省片子

請製軍裝估需銀款摺子

揀員請補盱眙縣知縣摺子

升任參將應請扣除摺子

應修卡房箭廳估需銀款摺子

恭謝

頒賞福字摺子

奏爲恭謝

天恩事竊臣標齎摺弁回奉到

恩賞福字一方當卽恭設香案望

闕叩頭祇領欽惟我

皇上掛元闡繹

介景均禔

調鳳律於始和嘉祥雲集

渥龍光於

特賁

宸翰星輝臣重溟連圻欣逢新序當雪澤六花之候春

滿江南仰

天題百順之名

恩來日下惟祝

韶禧茂丕昭

敷錫以延洪

泰運申釐益慶

升恒之萃祐所有微臣感激下忱謹繕摺恭謝

天恩伏乞

皇上聖鑒謹

奏 道光二十八年正月十二日具

奏奉

硃批知道了欽此

酌擬捐納營把總甄別補缺章程摺子

奏爲酌擬捐納營把總甄別補缺章程恭摺奏祈

聖鑒事竊照江南省把總補缺章程無論水陸先用營

弁七人後用効力期滿武舉一人以八缺爲一輪

蓋因武舉人數少於營弁而水陸操防營弁較熟

於武舉也現在豫工事例及捐輸案內捐納營把

總已到標者九名未到標者二名此項人員非獨

少於營弁亦難熟於武舉若照部行成例各按到

標先後與在營兵弁較拔二人後用捐納一人三
缺卽占其一似覺過優且未定効力年限甄別章
程恐該弁等技藝差操未盡練習殊難按班序補
查道光八年前督臣蔣攸銑曾將捐納營千總補
缺次序

奏奉部議覆准先用恩騎尉一人營把總三人武舉
一人後再用捐納一人以六缺爲一輪仍照文職
試用例到標一年期滿考驗甄別咨部方准輪補

在案維時因無捐納營把總是以未經議及臣於
此次援照比例咨准兵部覆令自行

奏明辦理臣體察情形應請將捐納營把總一項卽
照捐納營千總之例於到省發標後効力一年期
滿考驗弓馬平常水務未悉卽行分別降休如各
項均屬去得准其畱營候補咨部立案自期滿之
日起遇有把總缺出先用在營兵弁七人武舉一
人後用捐納一人以九缺爲一週如此量爲變通

庶在營兵弁及候補武舉不致壅滯向隅而把總
缺分較多捐納各員亦可次第輪補奮勉自効且
與千總甄別補缺章程均歸畫一臣爲營弁得人
起見理合恭摺具

奏伏乞

皇上聖鑒訓示謹

奏
道光二十八年正月十二日具
奏奉

硃批該部議奏欽此

甄別溧陽營都司傅萬選等摺子

奏爲甄別體弱多病辦公粗率之都司請

旨分別勒休送部恭摺奏祈

聖鑒事竊照營員以精力充足爲體勤慎辦公爲用必須體用相兼方爲無忝厥職茲查溧陽營都司傅萬選由直隸武舉出身洊升今職平日辦理營務尙無貽誤惟體氣孱弱近復多病操防難期得力又泗州營都司富廣係廂黃旗滿洲人由護軍洊

升今職質本粗浮辦事時多草率卽如該員上年
請借奇兵營紅船二隻作爲巡湖之用經臣查知
紅船一項宜江而不宜湖專札調回所有船板槓
具業已損壞過半查因不能駕駛久置湖邊所致
巡緝懈弛此其明徵以上二員皆難勝專營都司
之任未便稍事姑容惟富廣前經調考騎射尙可
相應請

旨將溧陽營都司傅萬選勒令休致泗州營都司富廣

給咨赴部引

見恭候

欽定所有甄別都司緣由臣謹會同安徽巡撫臣王植

江南提督臣尤渤合詞恭摺具

奏伏乞

皇上聖鑒訓示謹

奏 道光二十八年正月十二日具

奏奉

硃批另有旨片一件畱中欽此內閣奉

上諭李星沅奏甄別都司一摺江南溧陽營都司傅萬
選體弱多病操防難期得力著卽勒令休致泗州營
都司富廣辦事草率騎射尙可著送部引見欽此

附奏察看江西二鎮才力片子

再臣前奉

諭旨飭查江西九江鎮總兵清保南贛鎮總兵德坤才
力能否勝任當卽就臣所知先行據實陳

奏近復隨時隨事詳加體訪并因撫臣吳文鎔校閱
贛州官兵密函屬其乘便確查該鎮德坤光景茲
據覆稱德坤人頗體面營伍亦嫻惟所挑選鋒兵
丁擡礮烏鎗施放尙欠精熟將令兵情未能指揮

如意等語臣思南贛緊接廣東地方扼要總兵管轄十八協營必得威信交孚身先作則與士卒同甘苦待將備如腹心庶幾訓練有成緩急足恃細核德坤才具僅堪處常坐鎮於南贛要缺不甚相宜現在江西江南兩省總兵亦無員堪以請調可否仰邀

特簡於他省總兵內

俯加對調之處伏候

聖裁至九江鎮總兵清保臣仍留心考察均不敢稍涉
顛預謹附片密

奏伏乞

皇上聖鑒謹

奏

畱中

附奏拏獲河南商虞廳滋事案犯片子

再臣節次欽奉

諭旨飭拏河南商虞通判署被劫案内逸盜解赴山東
歸案審辦當將已獲汪端等九犯遵

旨解往先後附片

奏明在案旋據安徽蒙城縣拏獲張五管姬套劉得
三犯又據江蘇委員候補道周燾守備馮景尼會
督地方文武拏獲陳三卽陳幅林王文俊卽王文

學高士魁卽四魁三犯訊認行劫不諱查陳三等
三犯現有蕭縣民王士修京控一案必須該犯等
到案質訊方能定讞應解歸蘇州由撫臣陸建瀛
督同臬司訊明辦理其張五管等三犯已飭解赴
山東此外尙據該道周燾等會督徐州各屬拏獲
匪犯吳志青等一百六十餘名現飭各歸各案嚴
行審辦除鈔錄陳三等在江蘇犯案咨明山東撫
臣竝督飭所屬再行嚴密搜拏務期盡絕根株外

上冬淮徐各屬瑞雪頻霑地方安靖洵足仰慰

宸廑臣謹附片陳明伏乞

聖鑒謹

奏

硃批知道了欽此

奏報丙午綱淮北鹽課全清摺子

奏爲恭報丙午綱淮北鹽課照額全清仰祈

聖鑒事竊照淮北引鹽經前督臣陶澍於辛卯綱將湖
運滯食各岸減輕科則改行票鹽

奏准俟至年底核算造報奏銷嗣因票鹽試行有效
又經

奏明將湖運暢岸一律推廣辦理如有多運卽以融
代江運之不足並將科則復還舊制每引徵銀一

兩五分一釐在案茲丙午綱淮北鹽課錢糧於道光二十七年屆應造報

奏銷之期據鹽運使但明倫分別截數造具冊揭詳送前來臣查丙午綱應徵入奏不入奏正雜各課銀三十一萬一千一百二十五兩七錢二分七釐內票販請運引內徵完銀二十四萬五千二百四十八兩九錢八分一釐商運引內徵完銀六萬五千八百七十六兩七錢四分六釐以上丙午綱正

引額課業已徵足又丙午應帶徵道光八年丙午
銃引案內銃銷乙酉殘引節年引課銀一萬六千
三百二十四兩內於票販引內撥收銀三千七百
四十七兩六錢商運引內徵收銀一萬二千五百
七十六兩四錢以上丙午綱帶徵課欸亦已徵足
二共徵完正帶課銀三十二萬七千四百四十九
兩七錢二分七釐此淮北民販商運徵課各額之
實數也至運鹽引額查淮北丙午綱綱食各岸額

引共二十九萬六千九百八十二引內票販止該
請運正鹽二十一萬五千三百六十二引今自二
十六年造報

奏銷後起至二十七年年底止共請過四十七萬一
千七百四十九引內除應行造報正額鹽二十一
萬五千三百六十二引竝以溢請之鹽撥補江運
不足鹽一萬八千七百三十八引仍有溢請鹽二
十三萬七千六百四十九引計溢稅銀二十四萬

九千七百六十九兩九分九釐應遵道光十八年
奏案同二十七年餘存經費並另增雜課一併歸入
協貼淮南案內辦理又商岸丙午應請正鹽八萬
一千六百二十引今止運過鹽六萬二千八百八
十二引計不敷額鹽一萬八千七百三十八引係
賴票鹽撥補足數是票鹽行銷暢旺課額充盈堪
以仰慰

宸廑所有丙午綱淮北鹽課奏銷合額緣由理合恭摺

具

奏伏乞

皇上聖鑒謹

奏 道光二十八年正月十二日具

奏奉

硃批所辦好戶部知道欽此

附奏淮北餘銀片子

再淮北溢請票稅及雜課經費等項每年共可得銀三十餘萬兩於道光十八年

奏明留爲協貼淮南雜款又二十二年二月於淮南減運帶課並淮北加完南課案內

奏准該年開辦淮北票鹽仿照成案派令票販代納淮南懸引二十萬引入

奏正雜課銀三十一萬八千八百九十八兩九錢八

分九釐同協貼之三十六萬共銀六十七萬八千八百九十八兩九錢八分九釐統歸淮南造報入奏正帶正雜課銀在案茲據兩淮鹽運使但明倫詳明丙午綱溢請票稅二十四萬九千七百六十九兩九分九釐又加增雜課共銀九萬四千三百四十九兩八錢又票販所完經費及上綱餘存銀兩除撥商課及應支各款外盈餘經費銀十五萬八千二百四十兩四錢五分六釐零三共合銀五十

萬二千三百五十九兩三錢五分五釐照案協貼
淮南丁未綱銀三十六萬兩同票販應完代納懸
課二十萬引銀三十一萬八千八百九十八兩九
錢八分九釐二共銀六十七萬八千八百九十八
兩九錢八分九釐除統歸淮南造報入

奏外計仍餘銀十四萬二千三百五十九兩三錢五
分五釐零歸入下綱計數等情臣覆查無異合併

附片陳明伏乞

聖鑒謹

奏

硃批戶部知道欽此

揀員請補清河縣知縣摺子

奏爲揀員請補沿河要缺知縣恭摺奏祈

聖鑒事竊清河縣知縣范傳勲因甄別案內

奏參革職所遺係沿河要缺衝繁疲難四項兼全必

須幹員治理前經臣等會

奏以阜甯縣知縣屠元瑞請調旋准部議清河縣截

缺在先駁令另揀調補茲復於現任知縣內逐加

遴選非現居要缺卽人地未宜一時實無合例堪

調之員惟查有大挑河工試用知縣劉于瀉年三十八歲江西舉人大挑一等復挑河工引

見奉

旨以知縣用籤掣南河二十四年六月到工二十六年防汛出力奉

旨著免其借補以沿河知縣酌量補用欽此該員年壯才明誠實勤幹以之請補清河縣沿河要缺知縣洵堪勝任惟清河縣係屬調缺今以酌補人員請

補與例稍有未符但人地實在相需例得專摺具奏據藩臬兩司會詳前來臣等往返札商意見相同合無仰懇

聖恩俯念員缺緊要准以劉于涓補授清河縣知縣於河工地方均有裨益如蒙

俞允該員係酌補知縣請補知縣銜缺相當毋庸送部引

見亦毋須查造參罰謹會同江南河道總督臣潘錫恩

合詞恭摺具

奏伏乞

皇上聖鑒訓示謹

奏 道光二十八年正月二十四日具

奏奉

硃批另有旨欽此內閣奉

上諭李星沅等奏揀員請補沿河要缺知縣一摺著照所請江蘇清河縣知縣員缺准其以劉于瀉補授該

部知道欽此

候補知府審案出力請加鼓勵摺子

奏爲審辦案件出力之候補知府懇

恩俯加鼓勵恭摺奏祈

聖鑒事竊照江蘇地方民物繁庶訟獄滋多凡京控

奏咨及情節重大提省審辦之案竝各屬招解案件

犯供翻異情罪未協應行駁審者悉委蘇州府審

辦該府地當省會政務極繁必須委員幫審以期

各案速結查有候補知府鍾殿選熟諳刑名精詳

歷練前於柘林通判任內畱省審案悉臻允當嗣後加捐知府仍發江蘇於道光二十五年五月到省復經委入讞局遇有外府疑難之案竝飭前往查辦統計先後審結命盜重情及京控

奏咨各案共三百十四起其間頭緒較冗情罪較重者有如臯縣匪徒李得全殘殺商巡張正等十三名一案人犯二十六名又昭文縣民金得順等包攬滋事抗官拒捕一案人犯七十餘名又盜犯嚴

如等屢劫拒捕奪犯戕官一案人犯八十餘名該員晝夜熬審發奸摘伏究出首要各犯姓名住址得以迅速就擒卽獲犯各員隨案甄敘亦該員審辦得法所致又有荆溪縣民婦小張盧氏誤殺繼姑一案東臺縣民蔣鳳岐假裝縊死一案據稟添委該員會督審明小張盧氏係其姑誘陷邪淫不從誤傷致死蔣鳳岐係其妻蔣朱氏謀勒致斃此外幫審各案皆能衡情定讞從無翻異不服遲延

未結之事現委暫護蘇州府篆辦理裕如洵爲鞠
獄勤慎始終出力之員查道光二十六年湖北襄
陽府同知候補知府姚華佐在武昌漢陽二府幫
審奏咨要案三百餘起經兩湖督臣

奏請遇有湖北湖南兩省合例知府缺出儘先補用
欽奉

諭旨允准在案茲該員鍾殿選幫審案件情事相同臣
等不敢沒其微勞該員試用期滿業經

奏明堪勝繁缺知府可否仰懇

大恩俯准將候補知府鍾殿選遇有江蘇安徽合例應
補知府缺出卽行補用以示鼓勵之處據藩臬兩
司查明具詳前來謹合詞恭摺具

奏伏乞

皇上聖鑒訓示謹

奏 道光二十八年正月二十四日具

奏奉

硃批另有旨欽此內閣奉

上諭李星沅等奏候補知府審案出力懇恩鼓勵一摺
江蘇候補知府鍾殿選於派審案件先後審結命盜
重案計三百四十起之多尙屬出力著加恩遇有江
蘇安徽合例應補知府缺出奏請補用以昭激勸惟
功過必須並舉賞罰乃克持平勤能者固應保升關
冗者豈容竊位今鍾殿選旣已清釐積案多起其積
壓者究係何員豈可置之不問仍著李星沅等按數

查明分別參辦俾昭公允至保奏審案出力人員必
應將各任積壓及承審錯誤之員一併指參曾於道
光十七年特降諭旨距今未久何竟漫不記憶嗣後
各該督撫等務當恪遵前旨秉公核實總期勸懲並
用彰輝兼施庶更治蒸蒸日上朕實有厚望焉將此
再行通諭知之欽此

狼山鎮標游擊展限引

見摺子

奏爲外海水師遊擊現委出洋巡緝未能依限引

見恭摺奏祈

聖鑒事竊准兵部咨催越缺升署狼山鎮標右營遊擊
黃登第預保狼山鎮標右營千總劉軫作速赴部
等因自應遵照給咨赴部引

見恭候

欽定惟查近年以來江蘇海洋時有盜案雖據拏獲數
起嚴辦重懲而洋面未卽肅清現值辦理海運巡
防緝捕尤宜倍加周密先經臣會同撫臣提臣核
定章程竝因師船需用尙多札飭上海道縣雇募
民船添配官兵分起管帶又崇明縣職員施作舟
等將自置漁船捐募水勇隨營哨探由臣會同撫
臣遴委候補知府王夢齡會督鎮將出洋勦捕正
當喫緊之際查水師將領中黃登第尙稱得力若

遽調回給咨誠恐稍形鬆懈所有該員應行引

見之案相應照例請

旨展限竝請

敕部先給署劄開其底缺俟捕盜事竣再行給咨赴部

引

見其預保之狼山鎮標右營千總劉軫現在疎防失事

案件未便仍行保擢應將預保註銷毋庸送部仍

責令緝拏盜犯儻日久無獲卽行參革以爲玩視

捕務者戒理合恭摺具

奏伏乞

皇上聖鑒訓示謹

奏 道光二十八年正月二十四日具

奏奉

硃批依議兵部知道欽此

附奏新調蘇松鎮總兵陸鳳翔恐難勝任片子

再新任蘇松鎮總兵沈河清前奉

諭旨飭令馳赴新任當經臣恭錄分別咨行日久仍無
信息正深盼切接准閩浙督臣劉韻珂咨會沈河
清熟悉閩洋已奏請與海壇鎮總兵陸鳳翔互調
自係爲缺擇人應卽恭候

命下臣何敢復有瀆請惟查水師官兵閩粵爲最浙江
次之江蘇又次之蘇松鎮一缺因已革總兵林明

瑞在任數年竝不出洋巡緝每遇考拔弁缺止論弓馬不論水務將備弁兵相率效尤以致舟師廢弛盜案層出迨臣與撫臣會委文職大員馳往督查巡洋弁兵中多有不耐風濤者雖經先後

奏咨斥革懲辦而積習成痼亟待挽回非得公正明幹之總兵督率教演何能日有起色沈河清實在才力亦非臣所及知第其籍隸廣東服官閩省久厯海洋復與江蘇營員向無交往可冀認真整飭

若陸鳳翔係南匯縣人由水師行伍出身游升京
口協副將於江蘇洋面情形固應熟習臣前在蘇
省畱心採訪實未悉其所長且其子弟親戚頗多
充當營伍現在川沙營把總葉振榮係陸鳳翔之
甥卽有帶兵巡洋捕盜不力詳揭咨革之案設令
陸鳳翔調任蘇松鎮總兵難保無意存瞻顧是水
師提鎮雖不必迴避本籍而因時因地量材酌用
陸鳳翔於此缺殊不相宜至各省洋面誠有不同

而長於水師者舉凡沙線之隱伏折戟之趨避一經彼此參酌自得要領似無難遷地爲良可否請旨仍飭沈河清卽赴蘇松鎮總兵之任抑或將蘇松鎮總兵一缺另邀

簡調祇候

聖裁再各省水師鎮將就臣近日所聞如浙江瑞安協副將葉紹春南澳鎮總兵陳顯生均稱能事江省如現署蘇松鎮總兵田浩然亦能破除情面勉圖

振作惟由參將升補副將未經到任卽署總兵能否力勝專閫尙須詳加察看臣爲水師需人起見謹附片縷陳伏乞

聖鑒訓示謹

奏

硃批另有旨欽此內閣奉

上諭李星沅奏水師總兵人缺未宜等語陸鳳翔著開缺以本省水師副將補用江蘇蘇松鎮總兵卽著現

署之副將田浩然署理仍由該督察看能否勝任再
行據實具奏欽此

糧道押運九次給咨赴部引

見摺子

奏爲糧道押運九次循例給咨赴部引

見恭摺奏祈

聖鑒事竊查嘉慶十一年欽奉

上諭嗣後糧道押運已屆三次並無過失者著該督撫出

具考語給咨由倉場侍郎查明送部引見等因欽此欽

遵在案茲據江甯布政使傅繩勛詳稱江安督糧道

沈兆灃於道光十九年十一月二十五日到任自道光二十年起至二十二年督運漕糧赴通屆滿三次隨漕給咨赴部引

見奉

旨著回任欽此嗣督運二十五年漕糧赴通屆滿六次並俸滿卓異送部併案引

見奉

旨沈兆灃准其卓異加一級仍註冊回任候升欽此茲

有督運過江安二省二十六七兩年漕糧抵通交卸無誤連今屆督運二十八年首進幫船前後共計督運九次核與引

見之例相符應請給咨該道齎領北上由倉場侍郎查明如此次亦無過失卽行送部引

見竝請加考具

奏等情前來臣查江安督糧道沈兆澐年健才穩明

練精詳上八屆督運漕船抵通全完經理均能妥

速本年押運已屆九次自應循例給咨抵通後由
倉場侍郎查明送部引

見除會同江蘇巡撫臣陸建瀛安徽巡撫臣王植漕運
總督臣楊以增給咨外相應恭摺具

奏伏乞

皇上聖鑒謹

奏 道光二十八年二月初二日具

奏奉

硃批吏部知道欽此

請將江甯縣范士義撤任另補摺子

奏爲知縣人地未宜請

旨撤任另補以重地方恭摺奏祈

聖鑒事竊照州縣爲親民之官責任綦重非精明強幹
爲守兼優不足以資整頓茲查江甯縣知縣范士
義雲南進士樸實小心素知自愛惟近來辦事較
形遲滯於江甯附省首邑不甚相宜未便稍涉遷
就又蕭縣知縣徐海珍陝西監生年力富强辦事

亦俱奮勉惟蕭邑界連東豫時有捻匪出沒當此
緝捕喫緊該員未悉機宜難期得力據藩臬兩司
具詳前來相應請

旨將江甯縣知縣范仕義蕭縣知縣徐海珍一併撤任
仍畱江蘇遇有相當缺出另行酌量請補范仕義
於道光二十四年在江甯縣任內曾經

大計保薦今旣撤任另補自難再予升轉竝請將卓
異註銷所遺江甯縣缺例應在外揀調蕭縣缺向

歸部選江蘇現有應補人員容再分別調補合併
聲明除將該二員經手倉庫錢糧飭令接任之員
認真盤收如有虧短卽行參辦外臣等爲慎重地
方起見謹合詞恭摺具

奏伏乞

皇上聖鑒訓示謹

奏 道光二十八年二月初二日具

奏奉

硃批另有旨欽此內閣奉

上諭李星沅等奏知縣人地未宜請撤任另補一摺江蘇江甯縣知縣范仕義於附省首邑不甚相宜蕭縣知縣徐海珍緝捕難期得力均著撤任仍畱江蘇遇有相當缺出另行酌量請補范仕義竝著將卓異註銷餘著照所擬辦理該部知道欽此

江甯縣蕭縣二處均奉

硃點

劃撥兩淮積欠豫工息銀摺子

奏爲兩淮積欠豫工息銀查無存款動解請分別劃
撥濟用恭摺奏祈

聖鑒事竊臣接准部咨議覆河南撫臣奏催兩淮各商
積欠豫省辛丑等綱息銀四十九萬四千餘兩儘
數迅速起解或催徵未齊卽將運庫應存別項閒
款籌撥湊足解豫應用仍由該督奏明辦理以重
課項等因具奏奉

旨依議欽此咨行到臣遵卽行司籌解去後茲據鹽運使但明倫查明豫工生息一款現無存銀此外亦無閑款動解詳請具

奏分別劃撥前來伏查兩淮運庫支絀情形及所存雜項止銀五萬餘兩臣於上年籌議鹽務竝奉撥官運餘息改動正項案內先後縷晰

奏明在案向來淮南雜課均係籠統徵存分別緩急動撥近年商疲引積厯綱多未徵齊遇有京外緊

要餉需不得不先儘支解卽如道光二十四年戶部撥借兩淮庫貯銀二十萬兩係將雜項湊撥應付又如每綱額徵部府帑利銀四十餘萬兩歷係徵少解多至豫工生息本款年額徵銀六萬兩從前每年僅解銀二三萬兩道光二十五六七等年因豫省待用孔殷共解過銀三十八萬兩不特較前多解數倍卽照額徵銀數亦多兩倍有餘無非就庫儲雜項設法支應今河南省

奏催未解銀兩多在歷綱未完之中緣雜項按引稽
徵運鹽方能完納鹽有未運餉課有未完加以折
運後展帶緩徵積欠纍纍非止豫工生息一款且
前項帑本久入清查現運各商節年空賠利息科
則之增重商力之消乏未始非此等款目積漸而
成茲運庫前存雜項及續收銀兩均已支解緊餉
並無存銀亦無別項閑款可撥惟查道光二十四
年戶部撥借運庫雜項銀二十萬兩本爲東河籌

備續又改解部庫原經

奏明於各省捐項內照數彌補上年十二月內咨部
撥還尙未准覆臣再四思維就此應還運庫之款
劃抵兩淮應解之銀尙屬以公濟公合無仰懇

天恩俯准

敕下戶部卽將前借運庫銀二十萬兩在於各省捐項
內籌補歸還劃作兩淮應解豫工息銀竝將不敷
銀兩另行改撥解豫仍容臣督同運司嚴飭各商

將各綱雜項陸續催完以濟要需而充庫貯相應
據實恭摺具

奏伏乞

皇上聖鑒訓示謹

奏 道光二十八年二月初二日具

奏奉

硃批戶部議奏欽此

附奏兼轄河務擬俟海運就竣再行赴工片子

再督臣兼轄河務向俟糧船過淮前詣清江駐劄

臣渥膺

重寄倍切悚忱因查本年春工較往時尤爲喫緊亟思

重運灌塘以前卽往會同河臣核實勘辦惟蘇松

太三屬漕糧現行海運定限二月放洋所有防護

兵船正須調遣策勵合堵分巡函札交馳探訪加

密江甯相距吳淞已不爲近清江則驛程更遠誠

恐呼應不靈擬俟海運就竣迅卽馳赴工次面晤
河臣籌商一切計尙不至後時惟當勉力兼營以
冀上紓

宸注謹附片陳明伏乞

聖鑒謹

奏

硃批知道了欽此

會籌淮南鹽務仍宜合力緝私摺子

奏爲遵

旨會籌淮南鹽務仍宜合力緝私以資整頓恭摺具

奏仰祈

聖鑒事竊臣等承准軍機大臣字寄道光二十七年十

一月初五日奉

上諭本日據戶部遵議李星沅奏淮南鹽務現辦章程

一摺已依議行矣又片奏楚岸滯銷情形等語據稱

楚岸鹽價前因積滯過多先後酌減現在存鹽積引
幾及三綱之數銀價日昂鹽價益形喫重若不亟加
整頓於國課關係匪輕著李星沅裕泰率同該運司
鹽道確查漢岸現時鹽價每觔究係合錢若干竝現
在存鹽因何遞年積壓一至於此究應如何設法補
救之處熟籌妥議迅速奏辦至淮南行銷之江西安
徽湖南湖北各口岸巡緝尤關緊要著該督等分咨
各該撫嚴飭地方文武不分畛域實力巡查總期實

心經理俾鹺務日有起色等因欽此當經分別咨行
欽遵辦理竝由臣裕泰查明存岸鹽數及售鹽價
值先行

奏覆在案茲臣等督同司道確查引鹽積壓情形及
應如何補救之法往返籌商悉心妥議伏查淮南
綱引疲滯積漸使然其大端在銀貴錢賤緣岸商
以銀交易水販以錢零售就近日銀價而論每銀
一兩兌錢二千文比之道光初年已增一倍小民

錙銖計較勢必貪賤食私因而私鹽易侵銷數易
絀截至上年十二月止湖廣存鹽七十餘萬引江
西存鹽二十八萬餘引加以在場未運約共幾及
三綱或謂減價敵私可冀疏銷存積第現在漢岸
價值每包售銀二錢三四分每勛合錢五六十文
較例價二錢九分五釐所減已多卽較往日售價
二錢六分零復有減跌而銷數仍未加暢是減有
本之岸價不敵無本之私鹽惟有嚴切緝私實爲

目前要務查楚岸地處腹裡粵私川私潞私票私
腳私四面侵灌占礙銷路不可勝數節經臣裕泰
委員分赴邊界巡查訪拏窩囤梟販不遺餘力各
州縣考核功過總以銷鹽暢滯獲私多寡爲憑現
又派委文武大員酌帶兵役在於走私要隘上下
查緝並於鹽船經過之武穴及泊船之塘角地方
原設卡巡盤驗辦理未嘗稍懈至場竈透私之所
首當設法清釐臣李星沅先後委員勘明水陸隘

口扼要堵巡竝飭分司場官督率竈頭竈長逐日稽煎填註火伏務令鹽盡歸垣不准顆粒透漏其儀徵改捆均經嚴飭同知大使等親赴捆場認真掣驗查禁買硃放勦預防腳私夾帶仍實發江船水腳於船旁烙印查驗分別究懲迨由儀徵出江復飭各岸營縣逐層列卡盤查竝專委京右奇兵兩營遊擊總司江面巡緝向來淮揚一帶幾成販私淵藪自上年九月起獲貴池官運私鹽一百十

五萬餘勛

奏參嚴審竝陸續拏獲鹽犯三百餘名私鹽七十餘萬勛有已審擬軍流咨部者有批飭審辦尙未定擬者數月以來梟徒稍知儆畏江西安徽湖南湖北各口岸亦經臣等疊咨各撫臣嚴飭文武不分畛域堵截梭巡能少一分私鹽卽多一分官引如果奉行確實似於銷路有裨竊思淮南鹽務自歸總督管轄今已十有八載中間或暢或滯整理多

方要皆變通於成法之中未敢紛更於成法之外
誠以有治人無治法法不敝而人敝之近因銀貴
錢賤累及全局則又時會所值不獨鹽務爲然若
欲另議更張動需歲月誠恐商情觀望轉致課餉
虛懸且當銀價未平收效亦無把握臣等再四籌
酌惟有合力緝私徐圖補救督同運司鹽道申嚴
舊例參酌時宜遇事講求實心經理並飭各商趕
緊運銷以冀漸次疏通離綱日有起色萬一積重

難返實有應行變法之處容再

奏明辦理斷不敢稍存成見畏難苟安所有淮鹺積
引臣等會籌疏緝緣由相應合詞恭摺具

奏伏乞

皇上聖鑒訓示謹

奏 道光二十八年二月十一日具

奏奉

硃批戶部再行議奏片併發欽此

整理江安綱食引地事宜摺子

奏爲查明江西安徽綱食引地分別整理事宜恭摺
具

奏仰祈

聖鑒事竊照興利必先防弊疏引尤在緝私查江西省
額行淮南綱鹽二十七萬七千餘引所有行銷地
面多與廣東福建浙江三省毗連淮鹽道遠價昂
鄰私路近價賤每多越境充賺占礙正綱如閭私

侵入撫州建昌浙私侵入饒州粵私侵入吉安等
府久爲淮鹺之害自道光十二三年前督臣陶澍
等籌議章程堵粵私則有良口市等六卡堵浙私
則有石港等十卡堵閩私則有許灣等十餘卡分
委文武員弁嚴定功過章程先後

奏明遵行頗著成效臣於上年復加考察原設卡巡
各路布置已極周詳聲勢亦均聯絡第所派佐雜
文員職分較小汛兵不聽調度卽經咨商撫臣於

候補丞倅牧令中遴員分別更替責令地方營縣
會同實力堵緝俾得呼應較靈惟南昌一府分銷
淮鹽十餘萬引而南昌新建二縣又分銷一府之
半該府屬地連省會戶口滋繁額引倍於他郡近
年益覺滯銷臣密訪所由緣儀徵江船裝載商鹽
向運至星子縣所屬青山地方收幫停泊該處濱
臨鄱湖距省較近江船剥船及划腳小船皆聚於
此非盜官引以濟私卽賣腳鹽以影射挖包收租

過籠填艙種種弊混不可枚舉以致蔓延省岸銷
路愈難卽經札飭鹽法道熊我親詣青山逐加釐
剔驗江船之艙口盤裝載之鹽包按艙剝空核實
見數以防夾私盜賣之弊江船向帶空包藉詞破
損更換偷爬改捆今改由商自備禁止買帶卽以
原包交商照額稱收倘有輕短立提究懲以防偷
挖收包之弊稽查剝船按數編號姓名籍貫書寫
船旁卽船身之大小定裝鹽之多寡給發印票俾

資核對其青山河划船母許剝載以防過籠填艙
之弊又如江船到岸浮費嚴飭革除以省擾累沿
途派撥催儻責成員役以免遲留此查辦江西綱
岸之情形也至安徽一省綱食相兼分銷淮南北
引鹽淮北票鹽售銷甚旺惟應行南鹽之安慶池
州太平甯國等四府屬近年銷市比之楚西更疲
原認各商刻思退避酌劑官運亦無轉機惟加意
緝私尚可從容挽救經臣遴委泰州分司運判許

惇詩前往勘明要隘添設卡巡務爲保衛藩籬之計至甯國府屬旌德太平二縣溪灘居多運艱費重民間買私成習亟應招徠水販分設子店於附近灣汊地方領買商鹽運回轉售或由該岸商加貼腳費或由各祠長約數分銷並嚴拏抽費縱私之擔頭放債濟梟之匪徒札飭安徽藩司督同府縣分別查辦仍咨會撫臣遴委文武幹員會督兵役於安慶甯國兩府屬之天堂汎箬嶺等處駐紮

巡查務期有犯必懲以遏梟販此查辦安徽綱食
引地之情形也伏思淮鹽行銷六省湖廣之外江
西安徽引數亦多同爲

國家經費所關當銀貴錢賤之餘正私充引積之會
弊成於漸時際其難臣刻凜重肩敢不殫誠竭思
力圖補救仰副

聖主整飭淮綱之至意所有該二省鹽務設法釐剔疏
緝緣由理合恭摺具

奏伏乞

皇上聖鑒訓示謹

奏 道光二十八年二月十一日具

奏奉

硃批依議該部知道欽此

附奏辦理南鹽力求庫貯商情兩無窒碍片子
再淮南課引繁重甲於天下歷來籌銷之法固在
緝私亦在輕本商本較輕轉運自便臣受事伊始
卽以此爲亟圖溯查揚州浮費前督臣陶澍任內
先後查辦凡可以節省者業已覈實刪除現在科
則列徵悉關京外餉需殊難再加裁減計惟修明
成法隨時因革如刪併官件酌撤冗巡曾經

奏明飭遵無非輕本恤商之意閱今數月在揚新殘

未運引數猶及兩綱楚西存鹽合共百餘萬引與
臣前奏畧同商人資本無多深虞占攔近聞籌議
補救不無觀望之思本年春單請運尙少據湖廣
督臣查明漢岸章程旣無應行更張之處每歲岸
銷數目總在七十萬引有奇所有各商售出課銀
應卽趕辦後鹽陸續捆運由臣督飭運司認真體
察經理竝將丁未上半

奏課照數催完依限造報未敢稍涉鬆勁惟准湖廣

督^臣咨會抽查塘角鹽船內有包硃不符及三船
短少包數竝擬將殘引融楚暫行停減鈔錄片奏
前來^臣查包硃重勦藉備暑耗拋灑久之遂滋錮
弊而船戶盜賣影射愍不畏法幾至視若固然尤
當就案懲辦^臣於緝私一節疊經札飭南監掣同
知及沿途地方官上緊嚴密稽查不准畧有疏懈
至停減殘引融楚誠爲清釐積滯起見第查丙午
等年五綱推展減運原爲帶銷殘引地步據九江

關呈報上年過關楚鹽共止五十六萬餘引未經
運足綱額且殘引向在額引以內初非額外增加
卽有食岸融銷而於綱岸減運仍不足數其中未
完雜項均屬撥解要需正須運鹽完課藉資周轉
勢難停減不行臣於上年

奏明將新殘及融楚引鹽分別勻配嗣又準核催商
一併完課趕運當此運庫支絀

國用孔殷不能不酌劑權衡先其所急應仍照案辦

理以期庫貯商情兩無窒礙除咨覆湖廣督臣督
飭鹽道廣招水販設法疏銷外謹附片陳明伏乞

聖鑒謹

奏

硃批覽欽此

夷目來省控訴現委藩司馳往覆查摺子

奏爲夷目來省控訴尙無要挾別情現委藩司道員
馳往覆查恭摺由驛具

奏仰祈

聖鑒事竊臣等接據蘇松太道咸齡稟稱二月初四日
英夷麥都思等三名違約至青浦縣地方散書與
看守減船舵水爭毆受有微傷該縣獲犯二名枷
責並將麥都思等送回上海該領事阿利國因獲

犯無多派撥夷目坐小夷船由大江來臣李星沅
衙門控訴等情臣等當卽飭委署江蘇臬司倪良
燿候補道吳健彰馳赴上海分別查辦並飛行沿
江各營縣嚴密防範曉諭居民毋庸驚慌並委素
諳夷務之京口右營遊擊陳柏齡署高資營都司
張攀龍同鎮江府知府沈濂由長江迎赴下游相
機攔截查係雙桅小船一隻並無後繼之船有該
國繙譯官夏巴能通漢語卽向詢問知因麥都思

等被毆蘇松太道辦理遲緩遵照章程如無總理
五日大臣之處卽赴省垣大憲處申訴於二月十
六日從上海開行先將船上礮門封閉礮位橫置
船內自副領事羅伯孫等下至舵工水手共五十
餘人沿途概禁登岸不與民人交接復經陳柏齡
等告以省垣大憲已委司道前往查辦獲犯多名
解赴上海此時案必完結卽有呈件亦可代投令
其卽速回棹夏巴日稱係奉阿利國所委若不面

見總督必被譴責況彼此久經和好此番孤船伸
冤沿江礮隄官兵亦斷不肯轟擊堅欲前進相持
竟日言貌甚恭因江路節節淺阻二十六日始抵
附近省城之八字溝江面不能再進臣李星沅卽
於二十七日傳見據投伸陳一件核與陳柏齡等
所稟相符面詢該譯官夏巴惟懇另委藩司大員
前赴上海會同臬司查辦別無他求適臣李星沅
接到臣陸建瀛來信知署臬司倪良燿行抵上海

後將滋事水手拏獲就近訊辦該領事阿利國已
無異言海運米船亦均暢行無阻當向夏巴等剴
切諭知夏巴等口雖感頌仍以未得阿利國行知
爲詞且稱赴省申訴原非得已必委官職大於道
員者乃不在此跋涉因查蘇松太道咸齡辦理此
事原欠警速有無措置失當以致遠來伸陳自應
暫行撤任飭委江甯藩司傅繩勛再往確查竝訪
有請假在籍直隸候補道陳之驥曾任浙江甯紹

台道練習夷情亦卽派令前往會同署臬司倪良
耀詳慎體察務期日久相安一面給予回文賞以
食物該會等均各欣服仍派遊擊陳柏齡等卽速
扣護出江除俟由江入海另摺

奏報及札委候補道吳健彰暫行代理蘇松太道篆
務外所有阿利國伸陳及臣李星沅行知各一件
照錄恭呈

御覽事關夷目來省控訴誠恐上廑

聖懷謹將辦理情形會同江甯將軍臣裕瑞合詞由驛
馳

奏伏乞

皇上聖鑒訓示謹

奏 道光二十八年二月二十九日具

奏奉

硃批另有旨欽此

上諭李星沅等奏夷目來省控訴現委藩司道員馳往

覆查一摺覽奏均悉華夷接壤地方立有一定界址倘有違約私行必致鬪毆以啟爭端不可不防其漸茲據該督等奏稱暎夷麥都思等三名違約至青浦縣地方散書與看守減船舵工水手爭毆受傷該領事以該縣獲犯無多派夷目來省控訴旋據陸建瀛告知該署臬司行抵上海將滋事水手獲辦該領事已無異言而該繙譯官仍以未得該領事行知爲詞堅求另委大員前往會辦該督現已飭委藩司等前

往會同該署臬司查辦著李星沅等卽先行飭令該
藩司等覆加詳慎體察情形迅速查辦及早完結免
生枝節總期持平妥協日久相安至耆英係總辦夷
務之員五口通商事務均應管理本應前赴上海查
勘現在雖有細微波折亦須前往指示機宜著無論
行抵何處接奉此旨卽改道馳赴江蘇就近查看大
局如李星沅等辦理未竣卽著耆英會同商酌務得
其平勿留嫌隙陸建瀛所屬各海口儻該夷有陳訴

等情卽著飛速知會耆英李星沅以憑核辦至舊定
界址不准違約私行該夷等或有未盡知悉之處著
耆英致信廣東令該夷會廣爲申明約束勿令該夷
人再有越界散行致啟爭鬪之事耆英所用文移等
件准其鈐用兩江總督關防將此各諭令知之欽此

附奏夷來省所過各隘情形片子

再英夷此來控訴船小力單江路衰延原不難扼
要阻遏但既藉稱條約倘必勉強止之恐彼得以
有詞轉生枝節故卽坦然示以不疑惟密飭遊擊
陳柏齡等以導領爲由沿路引之入淺使彼節節
阻滯所淺之處必有柴草船停泊以爲疑兵其沿
江礮隄官兵並不戎裝排列各守各地若見若隱
該夷頗有戒心時以江路難行爲言或可潛消妄

念至該夷所請除飭委大員查辦之外別無要求
臣李星沅因有臬司在彼審辦完結未准所請該
夷總以未接阿利國明文爲詞且稱臬司現係道
員署理再三瀆懇由江甯另派大於道員者前往
會查窺其底蘊不過意在好勝希圖加以顏色然
以藩司出省遽爾准行又恐視爲容易不能不鄭
重出之以絕冀倖謹附片密陳伏乞

聖鑒謹

奏

硃批甚是欽此

修建營署兵房動用錢文摺子

奏爲修建沿江扼要營署兵房等工動用善後捐輸

錢文恭摺

奏祈

聖鑒事竊照丹徒縣境內韓橋地方切近圖山緊對江
心東生洲洶爲沿江扼要之區雍正四年因爲鹽
梟聚集侵擾兩浙引地經浙江省

題請將原駐簪灣之京口右營守備及兵丁一百六

十名移駐韓橋由兩浙巡庫籌撥銀兩建造守備
衙署一所計房四十二間兵房三百四十間年久
失修逐漸坍塌江蘇省辦理江防善後修復各營
衙署汎房時經前督臣壁昌飭司行委前任鎮江
常州二府並京口右營遊擊會同擇要勘估請將
韓橋汎守備衙署四十二間兵房二百四十間先
行修建以資棲止巡防其餘兵房一百間暫緩建
造計共估需工料銀四千六百三十五兩一錢一

分六釐零查照原案仍由浙省籌款修復咨准浙
江撫臣議覆應由江浙兩省各半分認復經行據
江蘇兩藩司議詳此案江蘇省應給一半該銀二
千三百一十七兩五錢五分八釐在於揚州府庫
存貯善後捐輸餘剩錢文內查照時價以錢合銀
移解給辦此後如有些小冊損由營自行粘補倘
遇限外冊倒以及應須建復之處卽由江蘇省照
例委員勘估請項興修臣查韓橋汛守備於江防

善後案內經前督臣壁昌

奏明專管東生洲礮隄有看守演練之責所有衙署
兵房委係刻不可緩之工未便因原案係由浙省
移建稍有推諉以致弁兵棲息無所應請將江蘇
省應給一半銀兩卽於揚州府庫存貯善後捐輸
餘剩錢文內查照時價以錢合銀動支給辦其餘
一半移咨浙江撫臣轉飭運司迅速籌辦卽以現
在完工之日起如遇限外坍塌應行修建卽照例

請頂辦理以免互諉謹會同江蘇巡撫臣陸建瀛
恭摺具

奏伏乞

皇上聖鑒敕部核覆施行再此項工程係江防善後案
內未經辦竣之工動用捐輸餘款應請免其造冊
報銷合併陳明謹

奏 道光二十八年三月初一日具

奏奉

硃批該部議奏欽此

六塘河隄工丈尺銀數摺子

奏爲已報工竣之六塘河隄工長丈尺銀數循例開
單具

奏仰祈

聖鑒事竊照海沭等處六塘河竝南北兩隄前因河身
淤墊隄工沖缺據士民呈請挑修先後委員核實
勘估聲明土方價值係援道光二年荆山橋河奏
明之例於地方沟工所定價值酌中定議奏蒙

俞允借款興辦飭委淮海道顏以燠江甯江防同知王
夢齡按段勘分督催各工員照估挑築完竣經臣
陸建瀛於署督篆任內親往履驗各工丈尺均屬
相符惟隄內間有沙土鬆浮未能一律飽滿責令
承辦工員賠修完整由臣潘錫恩前往覆驗如式
均經

奏報在案茲據江甯布政使傅繩勛淮海道顏以燠
會詳稱此項工程原估銀一十六萬二千一十三

兩六錢八分四釐現計實發銀一十五萬九百二十一兩零共節省銀一萬一千九十一兩零其土方價值照中河廳沭陽縣例價酌定將作過工程長寬高深丈尺並土方銀數開單詳請具

奏前來臣等覆核無異除飭議定攤徵年限造具估計攤徵各冊結另行詳

題外謹將六塘河隄工長丈尺銀數循例開單合詞

恭摺具

奏伏乞

皇上聖鑒敕部查照施行謹

奏
道光二十八年三月初一日具

奏奉

硃批該部知道單併發欽此

附奏英夷回帆情形片子

再英夷在青浦縣地方被人毆傷遣夷目羅伯孫等來省控訴先經臣會同撫臣將辦理情形并委員押護開行緣由據實馳

奏在案該夷船適值東風頂阻委員遊擊陳柏齡等又導之磨淺而行三月初一日始過六合縣之通江集江面該夷在省時屢向陳柏齡等言及伊等在粵常被民間欺凌若在上海亦遭挫辱則竟無

安分貿易之地不得已遵照條議至省伸陳亦斷
不敢時來煩瀆等語揆厥情形尙無他故除俟該
夷出江入海并藩司傳繩勛馳抵上海查明有無
起衅別情另行恭摺具

奏外謹先附片陳明伏乞

聖鑒謹

奏

硃批知道了欽此

奏報夷船出江入海日期摺子

奏爲夷船業已出江入海沿途並未登岸恭摺由驛
馳奏仰祈

聖鑒事竊照英夷麥都思等在青浦縣與人爭毆受傷
夷目羅伯孫等來臣李星沅衙門申訴一案當經
臣等將辦理情形並委員押護開行各緣由先後
奏報在案茲據沿江營縣稟報該夷船於三月初一

日駛過六合縣之通江集以後因風順水溜雖有

淺阻不如上水遲滯已於三月初三日駛過江陰
縣江面下游卽係大海沿途並未登岸晚泊江心
亦無居民船隻與之交接竝據署蘇松糧道桂超
萬等稟報海運米船截至二月杪業已掃數兌竣
開行毫無阻滯洵足仰慰

聖懷臣等伏查先定英夷善後條約載有將來
大皇帝有

新恩施及各國准英人一體均霑之語後定呷夷通商

章程又有各口領事官倘有不平申訴省垣大憲之語該夷卽藉此爲辭知內地遽難向阻至以鬪毆細故來省控訴若不設法禁止後此動輒踵行出入自便非獨無此政體且易駭人聽聞臣等現擬咨會

欽差大臣署理兩廣督臣徐廣縉照會各該國公使通行各口領事夷目嗣後如有不平之事竝無總理五口大臣應申訴省垣大吏者卽由該領事備具

伸陳封交地方官或由行商代爲遞送聽候批辦
無庸夷目前來至夷人原定條約各就地方民情
地勢議定界址本不准任意踰越上海口岸經前
任蘇松太道宮慕久與英夷德會及領事巴富爾
再三要約以早出晚歸不准在外過夜爲斷青浦
竝非一日可以往還之地麥都思等潛往散書該
舵水人等竝不將其拏交地方官送還夷目處治
擅自毆傷均屬違約臣等亦擬查照定章飭道曉

諭居民一體遵照以免別滋弊端所有夷船出江
入海日期謹會同江甯將軍臣裕瑞恭摺由驛馳
奏伏乞

皇上聖鑒謹

奏 道光二十八年三月初七日具

奏奉

硃批另有旨欽此內閣奉

上諭本日據李星沅陸建瀛奏夷船業已出江入海沿

途竝未登岸一摺覽奏均悉此次暎夷以爭毆細故輒赴總督衙門申訴無非藉口於前定條約內有儻遇不平申訴省垣大憲之語自當設法告以申訴只憑文牒未便夷酋親赴督轅李星沅等現擬咨會徐廣縉照會各該國公使嗣後遇有應行申訴之事卽就近備具伸陳封交地方官代遞聽辦自係尙未接奉前降諭旨現計耆英將抵江蘇應如何照約開導杜絕違約私入內地之處著卽會同李星沅陸建瀛

一面體察情形妥籌具奏一面飛咨徐廣縉曉諭夷民相安無事至所稱上海口岸本與噶爾再三要約以早出晚歸不准在外過夜爲斷所約本屬明白曉暢以後該夷等如復不遵條例耆英亦應豫爲勸諭屆時似此違約私行致有爭鬪勿議我國置之不理該地方官於事過之後剴切曉諭居民設遇夷人何足計較毋得擅自毆傷致起他衅至耆英遵旨前赴上海果否不致啟該夷驕恣妄求之心不能遙度著

該督察看情形自行斟酌又李星沅另片奏仍令藩
司傅繩勛前往上海覆查夷情等語著卽照議辦理
將此各諭令知之欽此

附奏夷目信件已交藩司帶至上海由道發還片

子

再臣傳見夷目羅伯孫等之時甫接撫臣陸建瀛
來函知署臬司倪良燿行抵上海拏獲毆傷夷人
各犯就近訊辦其如何議結未據倪良燿詳細稟
報誠恐尙有反復亦未知撫臣業已起程前赴上
海是以允准飭委藩司傅繼勛等馳往會同辦理
一面飛致撫臣暫緩起程至拜摺後始陸續接據

倪良燿稟報及撫臣起程日期因思馭夷之道難以理喻惟有宣示誠信或可折服其心臣旣面允羅伯孫等所請竝行文阿利國知照設藩司傅繩勛中止不行一似勒令暮更他族恐滋異議是以仍飭前往覆查竝屬就近稟請撫臣核示至夷目此來控訴沿途往返絕無一人登岸停泊近省之八字溝亦均安靜如常惟臨行時稟求瞻仰城外報恩寺因觀看人多致有喧擠經地方文武員弁

彈壓並將縣役枷示數名以資鎮定夷目當卽回
船開行亦無異詞再臣於初三日接准撫臣遞到
夷目阿利國寄羅伯孫信一件因該夷船行已遠
不及追付當將原信封寄藩司傳繩勛帶至上海
轉交代理蘇松太道吳健彰發還謹附片縷晰陳
明伏乞

聖鑒謹

奏

殊批另有旨欽此

上海安帖情形摺子

奏爲欽奉

諭旨謹將上海現在安帖情形並前此來省控訴只有
夷船一隻先行恭摺覆

奏仰祈

聖鑒事竊臣承准軍機大臣字寄道光二十八年三月
初五日奉

上諭李星沅等奏夷目來省控訴現委藩司道員馳往

覆查一摺華夷接壤地方立有一定界址儻有違約私行必致鬪毆以啟爭端不可不防其漸著李星沅等卽先行飭令該藩司等覆加詳慎體察情形迅速查辦及早完結免生枝節至耆英係總辦夷務之員本應前赴上海查勘現在雖有細微波折亦須前往指示機宜卽改道馳赴江蘇就近查看大局如李星沅等辦理未竣卽著耆英會同商酌等因欽此又奉三月初六日

上諭本日據陸建瀛片奏該夷小船赴省申訴據署臬司等稟稱前赴上海續獲互毆各犯令其認明懲辦夷目帖服已遣人將赴訴之船截回等語該撫此奏係在會奏之前該夷船前來申訴只係一船夷目已經李星沅接見抑或另有一船經地方官開導截回著查明具奏至青浦縣獲犯二名該夷認非正兇旋經獲犯枷責夷目帖服該知縣是否辦理不善亦著查明辦理等因欽此臣查夷目阿利國於署臬司倪

良耀等未到上海之先卽遣羅伯孫等駕小夷船一隻來省控訴撫臣陸建瀛片奏所指卽係此船追俛良耀等在上海獲犯懲辦後該夷阿利國雖稱遣人截回赴訴船隻竝未實有其事亦無另有一船經地方官開導截回至三月初三日准撫臣遞到阿利國致羅伯孫等夷書一封當因羅伯孫等船隻早已開行無從付給卽封寄藩司傳繩勛轉交代理蘇松太道吳健彰發還至藩司傳繩勛

等因沿途陰雨難行三月初十日始抵上海現在
如何查辦雖未接據稟報連得撫臣及上海各屬
函稟僉稱該夷羅伯孫等於三月初五日回至上
海面見代理蘇松太道吳健彰情詞甚爲悅服民
商亦均相安似可無事臣准廣東咨會

欽差大臣耆英於正月底業經交卸起程約計此時必
已行抵江西無論經由何路距江蘇總不甚遠藩
司傅繩勛等回省尙須數日俟其詳稟到時如

欽差大臣耆英已有到省的信卽當遵

旨會同商酌務得其平勿畱嫌隙以期日久相安竝查
明蘇松太道咸齡署青浦縣知縣金鎔有無辦理
不善再行會核具

奏所有遵查前次船隻及上海現在安帖情形謹先
恭摺覆

奏伏乞

皇上聖鑒謹

奏 道光二十八年三月十五日具

奏奉

硃批知道了欽此

附奏辦理夷務情形片

再上海地狹言厯華夷雜處而中外之辨自在人心隨處總難強合其安分良民既斥夷爲異類其不安分者則又引爲爭端雖義忿不如廣東情形亦略相似故五口惟廣東最要而上海卽次之有司務愜民情亦難遽拂夷情辦理實多棘手

膺

重寄極知才力弗勝祇以事屬地方猶冀勉驅駑鈍至

夷務夙未經歷夷情更未熟諳此次夷目伸陳小有波折力阻不可理喻不能幸而化險爲平近接上海來稟均稱藩司傅繩勛前往覆查不至另生枝節然當腹心偪處時虞變態以臣迂闇之性值茲橫狡之尤設或差之毫釐繆以千里臣一身捐糜無足惜所慮事關全局何敢強不知以爲知日夜焦思正深悚懼仰蒙

欽派總理五口大臣耆英來江查看指示機宜臣惟有

虛衷請益隨同商榷以期上副

宸廑謹據實附片瀝陳伏乞

聖鑒謹

奏

硃批知道了欽此

審擬官運夾私各員摺子

奏爲審明官運鹽船夾帶私鹽按律分別定擬恭摺
奏祈

聖鑒事竊照安徽貴池縣口岸額銷引鹽向係官爲運
銷又青陽銅陵石埭建德四縣口岸捆運不前經
兩淮運司飭委通州分司運判趙祖玉督同試用
鹽知事顏晉敏運鹽赴銷趙祖玉恐誤捆期不及
候臣批發卽先捆鹽出場經運司及通州泰州東

臺如臯各州縣營竝通泰分司富安場大使訪有
夾帶私鹽情事協同淮北監掣同知童濂都司宋
天麒查出私鹽二萬三千一百八十三包計重一
百十五萬九千餘觔掣獲船戶葛長富等二十五

名詳經

奏奉

諭旨將趙祖玉撤任顏晉敏暫行革職飭據掣獲江船
戶劉順高等十三名到案竝據攬頭婁鑑聞掣投

到因趙祖玉呈遞親供諉稱不知有夾帶私鹽情
事又經臣

奏奉

諭旨將撤任通州分司趙祖玉革職確訊懲辦等因欽
此卽經轉行欽遵去後茲據江藩司會同鹽巡道
督同江甯府審明解勘前來臣親提研審緣劉順
高羅安詳黃榮輝蕭名發周文發邵泳發張德廣
柏有才沈富林姜長林張萬順張毓書馮士華王

少堂陳德保姚通和姚錦沅袁春貴葛長富倪國
春周善金周善銀婁鑑示煥陳堂徐詳周泳菖楊
升蔡庭阮蔡洪順龔奎王敖咎珍顧太王和王如
籍隸湖廣江西江蘇等省沅陵等縣或駕船度日
或充掃丁差役均未犯案丁九煥籍隸如皋先在
泰州販私被獲擬軍留養王士貢籍隸湖南零陵
縣先因攬載吉慶祥等店綱引在途盜賣復創議
減租被江夏縣拏獲審擬枷號兩箇月杖一百流

二千里刺發福建泰甯縣安置在配脫逃銷燬刺
字道光二十七年夏趙祖玉督同顏晉敏撥運餘
西李堡等場官鹽三千四百引計三萬四千包赴
貴池建德青陽銅陵石埭等縣銷售顏晉敏卽飭
攬頭婁鑑雇得已獲之劉順高羅安詳黃榮輝蕭
名發周文發邵泳發及在逃之李合茂王紅運劉
紅發陳和發王元菖鄒秀發楊泳發羅亨輝劉秀
芳等江船十六隻因內河水淺顏晉敏督押各船

停泊揚州江口守候劉順高等分赴場垣查點鹽
包仍由婁鑑轉囑攬夥陳堂徐詳雇得已到之張
德廣柏有才沈富林姜長林張萬順張毓書馮士
華王少堂陳德保姚通和姚錦沅袁春貴葛長富
倪國春及未獲之吳兆有王樹林王萬寅唐茂才
劉長生潘文禮陳文才孫添柳唐明胡悅亮楊錦
幅竝已故之劉士蔚等剥船赴場剥運至江口過
載趙祖玉派差龔奎王敖管珍押運又添差顧太

王和竝家丁王如唐貴沿途催查劉順高等起意
販私夾帶又有現獲之蔡洪順王士貢及在逃之
伍登發等各出本錢交劉順高等附買圖販劉順
高等央妻鑑代爲購買言明獲利分肥妻鑑轉託
陳堂徐詳周泳菖楊升及在逃之葛玉等向丁九
煥蔡庭阮及在逃之周發葵韓金仁周源發仲七
胡三周四章江楊如煥言及丁九煥等各向不識
姓名擔上陸續收買私鹽又向富安場掃丁周善

卷一百一十五 江表 七

金周善銀收買塲鹽十餘萬勛通知婁鑑等帶領
劉順高等三面說合劉順高向韓金仁買鹽四萬
勛又代伍登發買鹽二千勛羅安詳蕭名發各向
丁九煥買鹽五萬勛又代蔡洪順王士貢謝春山
湯錦全各買鹽二千勛代屈文沅買鹽五千勛黃
榮輝向蔡庭阮買鹽五萬勛又代劉仁旗周又林
各買鹽二千五百勛周文發向周發葵買鹽六萬
勛又代武三買鹽二千六百勛邵泳發向楊如煥

買鹽十二萬勛又代周尙德買鹽二萬五千勛代
吳之連買鹽二千勛其在逃之李合茂等各向周
發葵等分買鹽勛均係下煥代記帳目婁鑑向剥
船戶張德廣等告知令其加裝每包給錢二十文
張德廣等貪利允從陸續分運下船丁役龔奎等
查知不依婁鑑從中關說令劉順高等給龔奎王
敖胥珍錢各二十千文顧太王和洋銀各四十圓
王如洋銀十圓代爲包庇剥船戶劉士蔚在途病

故其姪劉學仁上船接運不知加裝私鹽情事卽
經各州縣營場訪聞會同拏獲稟經臣先後奏參
奉

旨將趙祖玉顏晉敏革職行提來省訊擬解勘親鞫不
移案無遁飾查例載與販官司引鹽至三千觔以
上問發附近地方充軍又鹽場無籍之徒詐害客
商犯該徒罪以上發近邊充軍又律載犯無引私
鹽者杖一百徒三年引領牙人杖九十徒二年半

受雇馱載者杖八十徒二年又例載捕役受賄包庇窩家者實發雲貴兩廣極邊烟瘴充軍各等語此案江船戶劉順高等受雇裝運官鹽販私夾帶各至數萬勛丁九煥蔡庭阮各自收買興販至一百餘萬勛周善金周善銀身充富安場掃丁偷漏場鹽數至十餘萬勛均應從重問擬劉順高羅安詳黃榮輝蕭名發周文發邵泳發丁九煥蔡庭阮周善金周善銀十犯均請照興販官司引鹽至三

千勛以上例發附近充軍婁鑑承充攬頭輒敢貪利受囑托人購私及至差役查知復爲行求包庇實爲罪首若照私鹽引領及說事過錢例科斷罪均擬徒未免情重法輕婁鑑請比照鹽場無籍之徒詐害客商犯該徒罪以上例發近邊充軍聞拏投首不准減等王士貢蔡洪順各托劉順高等代爲購私販買數至百勛以上請照犯無引私鹽律杖一百徒三年陳堂徐詳周泳菖楊升代領買私

下煥登記帳目均請照私鹽引領牙人律杖九十
徒二年半剥船戶張德廣柏有才沈富林姜長林
張萬順張毓書馮士華王少堂陳得保姚通和倪
國春姚錦沅袁春貴葛長富十四犯貪利受載均
請照受雇馱載律杖八十徒二年龔奎王敖咎珍
顧太王和身充差役王如係屬家丁押運稽查是
其專責膽敢得賄包庇計贓在十兩上下均請從
重比照捕役受賄包庇窩家例實發雲貴兩廣極

邊烟瘴充軍仍照例刺字據供親老丁單各犯內
婁鑑情節較重丁九煥畱養再犯咎珍蠹役包庇
均不准查辦羅安詳黃榮輝蔡庭阮姜長林馮士
華姚通和葛長富是否屬實行查原籍取結辦理
周善金周善銀係兄弟同犯據供竝無以次成丁
之人亦飭查明酌畱一人養親王和徐詳倪國春
年逾七十照律收贖王士貢前在湖北犯案擬流
在配脫逃復犯徒罪行查犯案未到應解歸江夏

縣查明原案從重擬結其餘軍徒各犯分別定地
發配折責安置劉學仁中途接運不知載私情事
唐貴因病先回竝末知情得贓與業經病故之劉
士蔚屈文沅均請免議通州分司運判趙祖玉辦
運官鹽因恐誤捆期查照成案先行剥運赴揚再
請護照其官鹽包內輕重參差通盤牽算尙屬相
符亦非有意飾混惟船戶劉順高等夾帶私鹽至
一百餘萬觔之多丁役得贓包庇雖訊無知情故

縱情弊究屬失於覺察業已革職應毋庸議試用
鹽知事顏晉敏隨同辦運引鹽在江口督押船隻
其船戶在內河買私夾帶該員無從覺察惟不慎
選攬頭咎亦難辭顏晉敏相應請

旨開復革職仍請交部議處所有失察掃丁偷漏之場
員及販賣經由之地方文武各官均係自行查出
拏辦請免議處鹽勦照例充賞贓錢同載私剥船
迫變入官逸犯李合茂等飭緝另結除供招咨部

外理合恭摺具

奏伏乞

皇上聖鑒敕部議覆施行謹

奏 道光二十八年三月十五日具

奏奉

硃批該部議奏欽此

附奏淮北民販併納稅課片子

再淮北票鹽暢行每屆開局民販挾貲候驗不下數百萬兩因鹽有定額未能加倍運銷歷係照額徵存餘銀仍卽退還惟各販攜帶重貲往來運送既有慢藏之虞而時在冬臘數省紋銀會集揚郡計須二三月之久於州縣辦漕商賈貿易銀路不無妨礙本年正月丁未綱票鹽開局共據各販呈投銀八百三十餘萬兩其實額徵正稅雜課及認

納淮南懸課祇收銀八十九萬四千餘兩體察販
情咸以餘貲全行發還下屆仍須運集跋涉徒滋
緊費情願併納戊申一綱稅課屆期請票運鹽以
歸簡便據鹽運使但明倫督同總辦委員淮北監
掣同知童濂海州分司運判洪上庠悉心籌議應
於收足丁未綱課款之外將戊申綱應徵銀八十
九萬四千餘兩一併兌收其餘給販領回詳請具
奏前來臣覆核該司等所議係爲俯順販情竝免佔

礙銀路起見除批飭照辦並將所收丁未戊申兩
綱課銀照數貯庫俟各該綱奏銷屆期分別造報
候撥外謹附片陳明伏乞

皇上聖鑒謹

奏

硃批戶部議奏欽此

附奏請獎拏獲官運夾私各員片子

再官運鹽船載私影射較商船夾帶尤難稽查此次趙祖玉等承運官鹽船戶夾私滋弊經委員准北監掣同知童濂鹽捕營都司宋天麒等密帶員弁馳赴查拏共獲私鹽一百十五萬九千餘觔並罪應軍徒各犯三十八名現經臣審明定擬另摺具

奏該同知等不避嫌怨將私鹽全數起出當時獲犯

二十五名一破從來積弊洵屬緝捕出力正當查
私緊要之際未敢沒其微勞可否將知府銜淮北
監掣同知童濂以知府升用鹽捕營都司宋天麒
於引

見後以應升之缺升用俾昭激勸之處出自

皇上天恩其隨同出力員弁除例有承緝之員毋庸置
議外餘均由臣分別酌獎謹附片具

奏伏乞

聖鑒訓示謹

奏

硃批另有旨欽此內閣奉

上諭李星沅奏請鼓勵拏獲官運夾私各員等語著該部議奏欽此

提督病未全愈懇

恩展假摺子

奏爲提督病未全愈懇

恩賞展假限恭摺奏祈

聖鑒事竊照江南提督臣尤渤前因病後染受潮濕兩
足酸麻經臣及該提督先後奏奉

諭旨著賞假兩月善爲調理一俟病痊卽行回任等因
欽此欽遵於正月十九日交卸扣至三月十九日

兩月假滿茲該提督來省面商據稱蒙

恩賞假後安心靜攝已漸痊可不敢自圖安逸應否卽
行人

觀抑先遵

旨回任等語臣詳加察看該提督飲食言語俱已照常
惟步履略形遲緩偶遇階級升陟亦欠靈便靜坐
則神完氣足久無倦容勞動卽神氣較差必稍息
而後定是病體雖就痊可而精力尙未復原該提

督感激

鴻施不惜微軀急圖報効每一言及聲淚交并臣愚以爲與其勉力從公病或反覆轉致上塵

宸注莫若請展假限務期調養結實報

國日長向該提督再三開導屬令暫行回署加意醫調可否仰懇

天恩再行賞假兩箇月俟其氣體完固卽飭回任供職之處恭候

諭旨遵行謹恭摺具

奏伏乞

皇上聖鑒訓示謹

奏 道光二十八年三月二十六日具

奏奉

硃批另有旨欽此內閣奉

上諭李星沅奏提督病未全愈懇展假期一摺尤勸著
再賞假兩箇月安心調理欽此

附奏藩司由上海帶犯回省片子

再英夷羅伯孫等來省控訴一案先經臣會同撫

臣陸建瀛

奏明飭委江甯藩司傳繩勛等馳赴上海體察情形

詳慎查辦仰蒙

聖鑒在案該藩司等行抵上海接見該夷領事阿利國
等據稱犯已拏獲惟尙有被搶時辰表等物籲請
訊實嚴辦以儆將來別無他求該藩司等當以所

指各物若止於鬪毆時遺失不得以搶奪論若果因鬪毆而搶奪計贓已在徒罪以上卽應照例審勘聽候督撫核定未便在外議結向其明白開導該夷亦卽請將各犯帶回訊辦但求審定罪名行知蘇松太道就近照會以副和好現經該藩司等帶犯回省由署臬司倪良耀訊明妥速詳辦當不致另生枝節

欽差大臣耆英由長江東下計日可抵江甯容再遵

旨會同恭摺具

奏所有藩司業已回省夷情安帖緣由謹先附片陳

明伏乞

聖鑒謹

奏

硃批知道了欽此

附奏委署淮安府知府片子

再臣等接准部咨欽奉

上諭江蘇淮安府知府福楙著送部帶領引見欽此除
遵

旨給咨該員赴部引

見外所遺淮安府知府員缺查有江蘇候補道胡調元
老成穩練堪以委令暫行署理謹會同江南河道
總督臣潘錫恩合詞附片具

奏伏乞

聖鑒謹

奏

硃批覽欽此

揀員升署浦口營都司摺子

奏爲揀員升署陸路都司恭摺奏祈

聖鑒事竊准兵部咨浦口營都司江春榮參効遺缺係

陸路題補之缺例用應升應補人員臣查浦口營

都司管轄江浦等五州縣地方爲水陸通衢盜梟

最易出沒非精明強幹操緝得力之員弗克勝任

臣於通省陸路各守備內逐加遴選雖有合例應

升之員而緝捕勤奮者實難其選惟查有徐州鎮

標中營守備馮景尼年四十八歲安徽宿州人由
宿州營行伍出身拏獲擒匪縱紅等犯欽奉

上諭賞戴藍翎以守備卽行升用擬補提標前營守備
調補今職道光二十四年五月到任歷俸已滿三
年二十七年軍政案內經臣保

題卓異奉部覆准咨明俟服闋後給咨赴部該員年
壯技強熟悉營務歷署都司均能辦理裕如如近
來著名匪犯飭委緝拏悉多擒獲除尋常斬絞及

罪在遣軍以下不計外如曩劫擒首趙庭申陳奉
淋高士魁張三胖皆係該員拏獲實爲緝捕出力
之員以之請升浦口營都司洵堪勝任惟現在丁
憂尙未服闋與例稍有未符查有江南都司蘇勒
芳阿丁振剛段應元陳柏齡守備田浩然周名揚
江西李步月等均於服制期內先後

奏准升署遊擊都司厯有成案可循臣因員缺緊要
人地相需起見相應援案奏懇

聖恩俯准以馮景尼升署浦口營都司於營伍地方均有裨益如蒙

俞允該員於卓異案內應行送部俟服闋後併案給咨送部引

見除飭取履歷咨部外臣謹會同署理江蘇提督印務徐州鎮總兵官臣來英合詞恭摺具

奏伏乞

皇上聖鑒訓示謹

奏 道光二十八年三月二十六日具

奏奉

硃批另有旨欽此內閣奉

上諭李星沅奏揀員升署都司一摺著照所請江南浦
口營都司員缺准其以馮景尼升署俟服闋後併案
送部引見該部知道欽此

附奏請放九江水師營守備片子

再臣接准部咨江西九江鎮標水師營守備湯兆熊因病出缺竝無俸滿回任候題及水師卓異千總行文照例題補等因臣查水師營分題補缺出如本省無合例可題之員例得請

旨簡用江西通省額設內河水師三營惟南湖營有千總一缺現任千總李發春籍隸九江係屬同府與請升之例不符此外更無合例之員所有九江水

明倫彙編 家範典 卷一百一十七 江省
九十六
師營守備一缺相應循例奏請

敕下兵部於各省內河水師應升人員內開列請

旨補放以重職守謹會同江西巡撫臣吳文鎔合詞附

片具

奏伏乞

聖鑒訓示謹

奏

硃批兵部照辦欽此

附奏運銅人員請借銀兩片子

再前准部咨運銅人員實因守風阻水以致運費不敷須借銀接濟者委員確查實在情形

奏明借給將借過銀數知照下游省分總不得逾八百兩之數等因在案茲有雲南領解丙午年正運三四起京銅委員昆陽州知州桂文奎准升元江直隸州知州李令儀均因沿途風水耽延致將原領水腳銀兩支用罄盡曾經湖北撫臣准各借銀

三百兩本年正月

奏咨有案現在該通員等行抵江甯據稟修船船隻
運費不敷各請借養廉銀五百兩由江甯布政使
傳繩勘飭委江甯上元二縣分咎確查屬實詳請
循案借給前來臣覆核桂文奎李令儀所借銀數
與部議章程相符除飭司在於司庫蘆課款內動
放銀一千兩照數分借給領催令儼運前進並咨
滇省於該二員應得養廉及報銷找領銀內扣還

造報江省作正開銷暨分咨山東直隸兩省知照
外理合附片陳明伏乞

聖鑒謹

奏

硃批該部知道欽此

應修官廳卡房等工估需銀款摺子

奏爲查明應修逾限官廳卡房等工估需銀款恭摺

奏祈

聖鑒事竊照地方一切工程前奉

諭旨暫行停止其營汛卡房等項工程爲兵丁棲巡要地咨准部覆仍行修辦各在案茲據江甯布政使傅繩勛詳稱上元縣境內通濟正陽二門城頭官廳竝礮房均因年久未修坍塌不堪急應修建由

縣詳報到司委據江甯管糧同知南捕通判親勘屬實又該縣境內指月庵等各汛卡房久逾固限倒塌不堪亦經飭據江甯管糧同知勘明必須分別修建竝經該管府道遞核結轉由縣確估共需工料銀一千六十四兩四分八釐請於司庫耗羨款內動給興修詳請具

奏前來臣查前項官廳礮房卡房等項爲收藏軍儲及棲巡要地旣據委員勘明實因年久傾圯前修

固限久逾自應准其分別修建所有估需銀兩合
無仰懇

聖恩俯准循例在於司庫耗羨銀內動支給辦以資堆
貯而重巡防除送到勘結隨案咨部竝飭造估計
冊結另行詳辦外謹將請修各工土屆修造年分
及估計銀數另繕清單恭呈

御覽理合恭摺具

奏伏乞

皇上聖鑒敕部核覆施行謹

奏 道光二十八年三月二十六日具

奏奉

硃批工部議奏單併發欽此

查閱沿江礮堤並籌備火藥鐵彈摺子

奏爲春季查閱沿江礮堤完竣並籌製貯備火藥鐵彈恭摺奏祈

聖鑒事竊照大江南北兩岸礮堤各礮兵遵

旨按季輪演茲屆春季演閱之期臣會同將軍臣裕瑞

於二月初八日前往五龍山沙洲圩兩處礮堤校

閱滿漢官兵施放礮位如法其餘沿江各堤兵礮

查照定章輪應狼山鎮閱演該總兵現因出洋護

送海運米船未克分身隨經飭委臣標中軍副將
松安於三月十六日自瓜洲口閱演順江洲上下
兩處礮堤隨赴鎮江閱演北固山象山兩處礮堤
復抵閘山關閱演大二礮頭竝對岸江心東生洲
三處礮堤旋赴三江口閱演固土西成二洲礮堤
又赴驚鼻嘴閱演大小石灣竝劉閘沙礮堤各堤
土檔土堆均屬堅固護礮各兵及後路接應官兵
點放大礮頗爲純熟施放擡礮鳥槍聲勢亦均聯

絡竝無應効之處當將賞號銀兩分別獎賞以示
激勸呈報前來臣覆查無異惟每年演放各礮位
需用鐵彈火藥先經前督臣璧昌

奏明每年每礮配製九出春秋兩季各礮演放三出
共用六出餘剩三出嗣經

欽差尙書賽尙阿等勘議改爲每年每季演放一次每
次各礮均放兩出核計每年須用八出僅餘一出
臣於上年秋閱案內查明各礮成造時本有隨礮

鐵彈自數出至數十出不等按礮投配內多不能
合膛當飭各營將隨礮鐵彈及從前存留礮彈澈
底查明逐礮試配均勻派撥酌定以每礮足備三
十出爲率有餘者作爲每年演試之用不足及不
合膛者分別添改另鑄並飭據江蘇兩藩司議詳
責成省標四營製造加工火藥二萬觔以資儲備
嗣後應請每年每礮製造火藥鐵彈各八出出陳
易新又各礮火門鐵蓋及礮口木塞並無鎖繫日

久恐易損失蓋礮木罩亦多裂縫均經飭營加備
鎖鍊並於木蓋加用灰漆布條修理堅固以昭慎
重所需經費卽在善後捐款項下支給由司另行
彙案詳辦謹會同江甯將軍臣裕瑞合詞具

奏伏乞

皇上聖鑒謹

奏 道光二十八年四月十四日具

奏奉

硃批依議該部知道欽此

修造撥船估需銀款摺子

奏爲輪屆修造撥船估需銀款循例奏祈

聖鑒事竊查淮關於乾隆五十三年捐造撥船三百隻
交裏河外河二廳收管爲撥運漕糧河工料物之
用歲需大小修及拆造經費在於發交兩淮鹽商
生息銀內動用核銷續經酌定章程將前項撥船
派交裏外河同知各營一百隻其餘一百隻撥給
邳州經管以備貓兒窩一帶水淺處所撥運漕糧

在案茲據河庫道陳熾署淮揚道周燾徐州道韓椿詳據裏外河同知等會詳稱經管撥船三百隻內除歷年風損及毋庸請修船隻外截至道光二十六年實輪應裏外河廳大修船二十隻小修船三十一隻邳州拆造船十四隻共計大小修拆造撥船六十五隻俱係終年在於黃運兩河撥糧運料擊浪衝風往來梭駛船身腐朽罅裂篷索器具多有損壞急應分別修造出該道等飭委府廳逐

加查驗復又親勘無異所有裏外河廳大修船三十隻每隻工料銀三十兩小修船三十一隻每隻工料銀十五兩邳州拆造船十四隻每隻工料銀一百三十三兩三錢五分四釐三毫通共銀二千九百三十一兩九錢六分二毫核與例價相符應請在於淮商生息本款銀內動給修造以濟撥運
開摺請

奏前來臣等伏查前項撥船爲撥運漕糧河工料物

之用歲需修造經費歷於生息本款動用報銷今
道光二十六年輪屆修造船隻既經飭委府廳查
驗復由該管各道親詣查勘損壞屬實應請准其
動項修辦以資撥運除將送到清摺咨部查照外
謹合詞循例恭摺具

奏伏乞

皇上聖鑒謹

奏
道光二十八年四月十四日具

奏奉

硃批工部議奏欽此

臚陳江蘇洋面情形摺子

奏爲臚陳江蘇洋面情形恭摺覆奏仰祈

聖鑒事竊臣等承准軍機大臣字寄道光二十八年二

月二十日奉

上諭本日據楊殿邦奏拏獲洋盜訊有曾赴崇明上海等處各供當將案犯解赴蘇州審辦竝究出在逃首夥逸犯多名等語海洋盜賊肆行劫掠爲害商賈所關匪細現當海運漕米沙船陸續放洋之時固當嚴

密梭巡不可失事卽尋常商船往來洋面亦應隨時
保護不可稍有疏虞若如該漕督所奏江南洋面劫
案絡繹不絕並有傷斃人命擄船勒贖情事奈山一
帶復有盜船伺劫商米似此明目張膽何以嚴法紀
而靖海疆著李星沅陸建瀛嚴飭水師將弁認真緝
捕於海汊紛歧容易窩藏奸究處所實力搜查鄰境
交界地方尤當知照會同堵緝不得稍分畛域務期
將匪犯悉數擒拏不留餘孽現在海運沙船陸續北

上不患不加意巡緝卽運米事竣亦應飭屬常川搜捕毋稍疏懈俾安行旅至金三案內在逃首夥高發波等二十餘犯卽通飭各屬竝移會鄰封迅速搜捕按律懲辦無令一名漏網楊殿邦原片著鈔給閱看欽此臣等查江蘇省泛海商船由上海往來山東天津

盛京者每年不下六七千號從吳淞出口至崇明之十墩守風放洋歷蘇松狼山二鎮所屬洋面駛過

奈山迤東卽係黑水大洋竝無可以寄碇之處故
無管轄營分迨望見高麗邊門始轉舵西行以山
東之成山爲準收入內洋其自山東等處往來海
州阜甯鹽城等州縣商船則由成山傍岸行駛歷
東海鹽城廟灣三營內洋而止船數無多與往來
上海各船行駛洋面有內外南北之殊盜匪蹤蹟
因而各異其伺劫海州等處商船者多係本地土
匪卽現在該州會營拏獲之金三等類是也其伺

劫上海商船者如川沙南匯等廳縣向多土匪私
造船隻名曰濶頭舢板以採捕爲名與閩浙二省
盜船各自行劫並不結聚成幫自上年以來經臣
等嚴飭該管道員督同沿海州廳縣將額設漁船
一律編號書蓬止准一篙一櫓沿海採捕早出晚
歸不准在外過夜凡無號私船雖無爲匪情事船
則鋸示海濱人則枷號責懲竝拏獲行劫有案之
孖得全等八十餘名分別斬梟發遣川沙一帶土

匪漸知斂蹟惟閩省之烏船浙省之撐篷船盜匪
船大夥衆攜有槍礮游奕佗山左右商船動輒被
劫且有連船劫去將舵工放回取銀勒贖之事查
佗山在崇明縣直東外洋距十墩二百餘里陡立
海中無薪可樵無泉可汲且無避風島嶼向爲舟
師巡緝不到之地臣等因盜船在彼游弈亦必有
時寄碇何獨舟師不能堵拏密飭委員候補知府
王夢齡署崇明縣知縣孫豐會同營員詳加踴探

訪知該處爲商船所必經水深至六七托約可泊
船二三十號盜船向皆寄碇於此遇有風暴亦卽
遁去當由臣等差弁持令前往嚴飭遊擊黃登第
署參將劉長清管帶兵船駛赴柰山先行爭占寄
碇之所揔住要隘堵截梭巡如敢畏葸退避卽以
軍法從事旋據委員稟報二月二十三日各兵船
在柰山洋面遇見盜船二隻分投追捕該盜匪膽
敢開礮抗拒劉長清首先施放當頭大礮把總張

步青外委曹志剛先後拋擲火罐擊沉烏船一隻
守備毛正和千總龔成良外委錢玉崑擊沉撐蓬
船一隻生擒盜犯祝阿金等六名餘犯皆被斬殺
及槍礮火罐轟死竝撈獲槓具等物該二船盜匪
竝無一名漏網惟外委曹志剛船上舟師額外張
書言當盜匪開礮拒捕之時不避艱險親自把舵
直逼盜船致被擡礮擊傷斃命又把總張步青乘
坐雇募民船其舵工何有智駕駛直前亦被火槍

傷斃此次懲創之後盜匪稍知畏懼而海運米船
多至八百五十一號所派護送兵船合之例派巡
緝及添雇民船並崇明職員施作舟等捐備勇船
僅止七十四號頗虞鞭長莫及其初次放洋遭風
落後之呂永慶等數船仍被盜匪伺劫當經遊擊
黃登第等迅督弁兵奮勇追捕截回四船又浙江
定海鎮總兵鄭宗凱等截回二船又通州知州陳
介眉雇募漁船會商遊擊周震豫借備槍礮火藥

督率委員救護一船竝檢獲盜匪莊來青等十一名及另案洋盜五名現在海運米船計已全數駛入東境大局幸無他虞前調護送兵丁一千名配坐船四十隻及施作舟等捐雇勇船四隻臣等已飭俟東省接護後卽行撤退仍留營船十隻竝添雇民船二十隻在奈山一帶嚴密巡防其餘沿海各營分駕營船照舊堵緝第江蘇水師廢弛已久其所以廢弛之故雖由鎮將不得其人亦因原設

營制有未盡善之處臣等勉圖振刷悉力講求不敢以小效爲易能不敢以積重爲難返惟有恪遵諭旨咨會鄰省會督鎮將常川搜捕加意梭巡仍卽通盤籌議整頓水師緝捕洋盜章程另摺具

奏以期仰副

聖主綏靖海洋之至意臣等謹先合詞恭摺覆奏伏乞

皇上聖鑒謹

奏 道光二十八年四月十四日具

奏奉

硃批另有旨欽此內閣奉

上諭李星沅等奏臚陳江蘇洋面情形一摺據稱奈山一帶向有盜船伺劫經該督等飭派弁兵分投追捕該匪膽敢開礮抗拒雖經署參將劉長清等先後擊沉二船悉數生擒轟斃仍恐此外盜船尙復不少現在海運米船業已全數駛入東境惟洋盜肆劫爲害

匪細匪船往來游弈諒不獨江蘇一省洋面爲然現
當沙船北上固應嚴密巡緝加意保護卽尋常商船
來往亦豈容任令肆劫致成畏途已據該督等咨會
鄰省一體兜捕著沿海各督撫各飭水師將弁不分
畛域認真兜截不得稍畱餘孽至該督等奏稱水師
廢弛原設營制未能盡善現在整頓水師嚴緝洋盜
另議章程務當通盤籌畫於連界分捕合捕之處悉
心妥議總期責有攸歸漸著成效無得視爲具文有

名無實欽此

附奏請卹水師額外張書言等片子

再水師追捕盜賊全賴船隻而一船得力要在舵工近年江省水師從未聞出洋接仗擊沉盜船之事實由水師各營分有水兵陸兵名目水兵止管駕船不習技藝亦不挑拔弁缺與民船水手相似其積有年勞之舵工名曰舟師額外僅於季報冊內聲明咨部向無升擢之弁因之該水兵視爲竝無出身遇事不肯向前陸兵又多不識水性此卽

原設營制不能盡善之一端臣等廉知其弊通飭各營不准於水師中再分水陸名目遇有弁缺先儘熟悉水務槍礮獲盜著績之兵拔補一切例外獎賞舵工加倍該舵水始有踴躍用命者至添雇民船以補營船之不足而民船必用本船舵工該舵工既非在伍兵丁惟知性命船隻爲重每遇攻擊盜船鮮不退避落後今蘇松鎮標左營舟師額外張書言民船舵工何有智當署參將劉長清與

盜船互相攻擊之時破除積習奮不顧身直逼盜
船把總張步青等始能拋擲火罐將船隻盜匪焚
剿殆盡另船盜匪亦卽望而氣沮守備毛正和等
始得奮勇追擊計在事勞績該額外等實爲首功
而該額外等全力持舵旣無從閃避又無暇格鬪
致爲礮火所傷登時殞命卽與陣亡無異按例本
應請卹當此水師廢弛整頓維新應請從優議卹
兵心乃知振作可否仰懇

皇上天恩敕部將蘇松鎮標左營舟師額外張書言民
舵何有智照外委陣亡例給予卹典以資觀感臣
等爲鼓勵舟師起見謹附片具

奏伏乞

聖鑒訓示謹

奏

硃批另有旨欽此內閣奉

上諭李星沅等奏請將攻擊盜船被傷殞命之舵工從

優議卹等語江蘇蘇松鎮標左營舟師額外張書言
民舵何有智當攻擊盜船之時奮不顧身致爲礮火
傷斃情殊可憫據該督等查明實係首功當此水師
廢弛之際藉昭激勸張書言何有智著一併照外委
陣亡例給予卹典該部知道欽此

委勘旗營公租田畝酌議辦理摺子

奏爲遵

旨派員確勘江甯旗營教場公田委因被水磽薄議將
秋租銀錢各半兼收並分帶積欠俾抒佃力而敷
用款恭摺據實覆

奏仰祈

聖鑒事竊臣准江甯將軍臣裕瑞咨會欽奉

上諭裕瑞等奏江甯旗營教場田畝連被水淹漸形磽

李 文 恭 公 奏 議

卷十七

江督

單七

薄請飭地方官勘明辦理一摺近年各佃厯欠正租未清又帶徵展限等款催追未繳經該將軍等飭委同知各員會勘著交李星沅再行派員詳細履勘應否議減據實具奏等因欽此臣當卽劄司派委候補通判福祿堪詳細履勘去後茲據江甯布政使傅繩勛詳稱飭據該委員福祿堪會同原委旗員左司佐領福勒鑑暨理事同知上元縣遵卽親詣該處周厯確勘查得大教場旗田二千六百六十四

畝二分三釐小教場旗田七百三十五畝七分七釐共三千四百畝坐落正陽門外悉係沙土地勢低窪自乾隆三十六年該佃等領種起每年每畝交麥租錢一百六十文共錢五百四十四文交稻租銀三錢共銀一千二十兩年清年款從未帶欠嗣因道光二十二年以後節被水淹各佃無力培植以致漸形磽薄連年租籽歉收兼之銀價昂貴未能全數完租委係實在情形第銀錢一律折

減恐於旗營支放不敷若照舊徵收佃力又有未
逮現經公同籌議應請量爲變通每年麥租錢文
仍循其舊其每畝秋季稻租銀三錢改爲銀錢各
半兼交自道光二十八年爲始每畝交銀一錢五
分又錢一百五十文以示酌減竝請將二十六年
以前積欠銀錢俟兩年後分限六年帶繳二十七
年稻租除完尙欠一半銀兩勒令於報銷前完清
倘再延欠提案比追該田因係沙土向未科則今

諭佃勤力加培應俟轉瘠爲腴再行復額辦理等
情由司覆核轉詳前來臣查此項田畝歷係旗民
各半領佃歲收公租爲旗營礮兵月餉及官學膏
火等項之用經費所關未可稍有短絀而地瘠租
重亦當量予減輕就現議稻租銀錢兼收較原額
約減銀二百五十餘兩合之支放各項能否敷用
咨商將軍臣裕瑞等飭查核覆悉心通盤籌計每
年麥租稻租共收錢一千五十四串銀五百一十

兩除動放銅礮歲操藥鉛工價需銀九十三兩零
照市折放錢一百八十餘千官學膏火錢四百八
十千礮兵月餉銀四百八十兩之外尙可剩錢三
百八十餘千又銀三十兩其礮兵閏月餉銀四十
兩卽於無閏年分餘剩銀內湊撥旣屬足敷用款
應同分帶積欠均如該委員等所議辦理每年多
餘錢文照案留備修理軍器等項之需嗣後旗佃
欠租仍歸右司飭追民佃欠租移縣代爲追繳以

免延宕所有委勘旗營公租田畝分別酌議緣由
謹繕摺據實覆

奏伏乞

皇上聖鑒訓示謹

奏 道光二十八年四月十四日具

奏奉

硃批該部議奏欽此

揀員請署京口副將摺子

奏爲揀員請署水師副將恭摺奏祈

聖鑒事竊准兵部咨京口水師副將係內河水師題補
之缺例用應題人員先儘歷俸二年以上之參將
揀選保題等語查京口副將一缺駐劄常州府江
陰縣地方管轄京口左右高資三江四營沿江水
陸各汛八十三處及江陰靖江丹徒江都四縣所
屬各礮堤操巡事宜近則控制鎮揚遠則援應狼

福實爲本省江防第一要缺非結實勇敢之員弗
克勝任臣於江南省額設外海內河水師參將三
員內詳加揀選非現居要地卽人缺未宜均未便
遽行請升惟查有京口左營內河水師遊擊武迎
吉年五十三歲江南海州人由行伍出身歷升今
職於道光二十五年五月初三日引

見六月十九日到任曾經委署狼山鎮標右營外海水
師遊擊熟諳水性不畏風濤經臣預保內河外海

參將自委署京口副將一年有餘訓練嚴明認真
整飭先後督拏案犯除軍流以下罪名不計外共
獲罪應斬梟李得全等三十餘名江面頗爲靜謐
現在爲缺擇人無有逾於武迎吉者第以籍隸本
省之遊擊越級請升副將與例不符但水師人材
難得向不迴避本省其越級請升之案亦均邀

恩准行今該遊擊武迎吉樸訥勇幹操巡勤慎歷俸已
滿二年洵屬江省水師中得力可靠之員可否仰

懇

聖恩俯念員缺緊要人地相需准將武迎吉越級升署
京口內河水師副將以重江防如蒙

俞允容臣與預保案一併給咨赴部引

見恭候

欽定仍補歷參將俸二年屆期另請實授除飭取履歷
咨移部科查核外謹會同江甯京口將軍臣裕瑞
署江蘇提督徐州鎮總兵官臣來英合詞恭摺具

奏伏乞

皇上聖鑒訓示謹

奏 道光二十八年四月二十八日具

奏奉

硃批另有旨欽此內閣奉

上諭李星沅奏揀員請升署水師副將一摺著兵部議奏欽此

附奏運銅人員請借銀兩片子

再前准部咨運銅人員實因守風阻水以致運費不敷需銀接濟者委員確查實在情形

奏明借給將借過銀數知照下游省分總不得逾八百兩之數等因在案茲有雲南領解丙午年加運二起京銅委員署安甯州知州李暘又領解丁未年正運一起京銅委員南安州知州王階鉦均因沿途風水耽延致將原領水腳用盡曾經湖北撫

臣各借給銀三百兩先後咨會有案現在該二員
行抵江甯據稟一入內河起剝僱繹需用甚多運
費不敷請各借養廉銀五百兩並據湖北省並未接運內
午年加運一起京銅委員試用通判韓印海亦以
前情稟借養廉銀八百兩聲明湖北省並未絲毫
借過由江甯布政使傅繩勛飭委上元縣逐一確
查屬實詳請循案借給前來臣查雲南運銅委員
李暘王階鉦與湖北接運委員韓印海所借銀數

核與部議章程俱屬相符除飭司在於司庫雜稅
款內動放銀一千八百兩分別照數給領催令趲
運前進並咨雲南湖北兩省於各該員應得養廉
及報銷找領銀內扣還造報江省作正開銷暨分
咨山東直隸二省知照外理合附片陳明伏乞

聖鑒謹

奏

硃批戶部知道欽此

揀員請署贛州鎮標游擊摺子

奏爲揀員請署陸路遊擊恭摺奏祈

聖鑒事竊照江西贛州鎮標中營遊擊穆克登布因病
出缺所遺員缺例應在外揀選調補該遊擊駐劄
贛州府城地廣山深爲閩粵兩省門戶時有會匪
竊盜出沒生事必須精明強幹之員巡緝操防俾
資整頓臣於江西通省現任陸路遊擊及歷俸已
滿都司內詳加遴選非本任緊要卽人地未宜實

無堪以調升之員惟查有贛州鎮標後營都司羅
玉斌年五十二歲湖北穀城縣人由行伍歷拔千
總出師湖南征剿猺匪生擒首逆趙金隴之子趙
幅全等多名左手受二等傷奉

旨賞戴花翎並勝勇巴圖魯勇號升鄖陽鎮標中營守
備因弓馬欠準降補千總旋經出師廣東施放大
礮擊斃夷匪多名升四川綏定營守備卽在軍營
受劄復調江蘇打仗出力奏准升署今職歷俸年

滿

題請實授於道光二十六年閏五月領劄現委署理
贛標中營遊擊印務該員年強技可任事實心屢
歷戎行殺賊著績地方情形亦熟以之請升斯缺
洵堪勝任雖歷俸未滿三年與例稍有未符但人
地實在相需合無仰懇

聖恩俯准將贛州鎮標後營都司羅玉斌升署贛州鎮
標中營遊擊庶於營伍有裨如蒙

俞允該員引

見已滿三年容俟部覆至日給咨送部引

見仍俟扣滿都司厯俸照例另請實授除飭取履歷咨部外臣謹會同江西巡撫臣吳文鎔合詞恭摺具奏伏乞

皇上聖鑒訓示謹

奏 道光二十八年四月二十八日具

奏奉

硃批另有旨欽此內閣奉

上諭李星沅奏揀員升署陸路遊擊一摺著照所請江西贛州鎮標中營遊擊員缺准其以羅玉斌升署照例送部引見仍俟扣滿都司厯俸另請實授該部知道欽此

附奏暫緩出省片子

再臣前擬海運辦竣卽赴清江會籌河運灌塘事宜附片

奏明在案嗣因海運船隻多在十墩守風杪夏初始得接續放洋全數北上復值

欽差兩廣督臣耆英順道來江會商夷務臣未克分身前往茲查湖北江西重運漕船業經僦進瓜口湖南各幫亦已催提前進本年河水通暢灌塘船數

較少可期妥速渡黃堤工亦一律平穩惟洋面盜風未靖舟師甚難得人正在籌議捕盜章程竝咨商浙省會同扼要堵緝辦理均關緊要是以暫緩出省仍容臣察看河湖水勢如有應須前往之處再行隨時奏

聞俾得先其所急不致稍有歧誤伏乞

聖鑒謹

奏

硃批知道了欽此

請製軍裝估需銀款摺子

奏爲請製逾限軍裝估需銀款循例恭摺奏祈

聖鑒事竊照各省動支司庫錢糧數在千兩以上者例
應

奏明辦理茲據江甯布政使傅繩勛詳稱揚州營請
製號帽褂鳥槍腰刀牌刀簾牌帳房子母礮鉞斧
等項軍裝均於乾隆年間製造久逾保固例限損
壞不堪應行修辦由司委據揚州府知府吳葆晉

詣勘具結飭委督標中軍副將松安覆加確勘屬實加具勘結由營按例估計除舊料變抵外實估需工料銀一千九百三十兩九錢四分三釐請於司庫存公銀內動給製辦詳請具

奏前來臣查揚州營請製各項軍裝既據臣標中軍副將松安揚州府知府吳葆晉親詣勘驗均係逾限損壞自應准其動項製造仍俟工竣飭委大員前往核實點驗如有草率偷減情弊卽將承辦之

員嚴參著賠除飭取造估計冊結照例詳辦並將
上屆修造年分另繕清單咨部查照外理合循例
恭摺具

奏伏乞

皇上聖鑒敕部核覆施行謹

奏 道光二十八年四月二十八日具

奏奉

硃批該部議奏欽此

揀員請補盱眙縣知縣摺子

奏爲沿湖要缺知縣需員懇

恩俯准升補以裨地方恭摺奏祈

聖鑒事竊照安徽盱眙縣知縣陳霄患病開缺所遺盱

眙縣係疲難兩兼沿湖要缺例應在外揀選調補

該縣濱臨洪澤湖與高家堰接壤緝匪防汛均關

緊要必得熟習幹練之員以資整飭臣等於現任

知縣及候補卽用並以沿河知縣酌補人員內詳

加遴選或現居要缺或與例不符或未諳河務機
宜或未悉地方利弊人缺均不甚相宜惟於應升
人員內查有甯國府經歷孟傳嶧年五十七歲順
天宛平縣人祖籍山東由供事議敘府經歷分發
安徽試用因拏獲要犯多名奏奉

諭旨著以府經歷本班儘先補用咨補甯國府經歷道
光二十一年七月到任復於代理霍邱縣任內首
先拏獲鄰省斬決首夥盜犯三名並遭流夥犯三

名送部引

見道光二十七年二月奉

旨孟傳嶧著以應升之缺升用欽此現署盱眙縣知縣
該員老成謹飭辦事認真歷俸已滿五年並無違
礙處分惟盱眙縣係沿河題調要缺今以府經歷
請升與例稍有未符但該員在皖年久熟悉地方
河務現署斯缺辦理捐賑均能實惠及民輿情極
爲愛戴且係奉

旨應升之員當此人地相需例得專摺

奏請據藩臬兩司會詳前來臣等往返劄商意見相

同合無仰懇

天恩俯念員缺緊要准以甯國府經歷孟傳嶧升補盱
眙縣知縣洵於地方河務均有裨益如蒙

俞允該員獲盜引

見未滿三年毋庸給咨赴部任內罰俸處分例係初升
毋庸核計所遺甯國府經歷員缺皖省現有應補

人員容再遴員請補合併陳明謹會同江南河道
總督臣潘錫恩合詞恭摺具

奏伏乞

皇上聖鑒訓示謹

奏 道光二十八年五月十二日具

奏奉

硃批吏部議奏欽此

升任參將應請扣除摺子

奏爲升任參將交代案內列有攤補鉅款應請扣除
引

見調回查辦恭摺奏祈

聖鑒事竊照蘇松鎮標中營遊擊陳長泰奉部掣升吳
淞營參將調取引

見適值海運米船出洋經臣

奏明飭委該員督押前至天津交卸並發給咨文令

於事竣赴部其在蘇松鎮標中營遊擊任內經手
軍裝器械錢糧因起程迅速詳明俟回南時點驗
結算在案茲據署遊擊王大春稟稱接管卷內有
借欠崇明縣庫銀八千二百三兩九錢七分據陳
長泰稱自嘉慶二十年起至道光二十六年止墊
用巡洋燈燭及一切無著之款飭據各營守備議
請在於蘇松鎮標中左右及原隸蘇松鎮標奇營
今改隸福山鎮標左營共四營自總兵至外委應

得養廉內移司分作八年扣還歸款查無左右二
營及福山左營將備商辦文移未便攤扣竝據福
山鎮總兵孫雲鴻呈據左營遊擊黃登第守備周
希濂稟稱有無借墊銀兩從無聞見現在亦未曾
議呈請核辦前來臣查巡洋燈燭等項所需無幾
各營例有公費何以不由鎮將備弁隨時自行買
用輒行借墊至八千數百兩之多爲時三十餘年
之久率請概由現任人員捐廉歸補卽無弊混已

屬偏枯且此項銀兩憑何借支此項帳目憑何銷
算歷任交代何以未經清釐現請捐補何以未經
會議更恐有侵漁入已捏款流攤情事若不澈底
查明嚴行參辦勢將各營效尤藉端剋扣兵餉流
弊不可勝言除咨明兵部扣除引

見竝飛飭陳長泰督運事竣迅卽回營聽候查辦一面
行令蘇州藩司調查冊領卷據究竟是何弊混此
外有無經手未完事件另行

奏參革審外謹先會同江蘇巡撫臣陸建瀛署江南
提督臣來英合詞恭摺具

奏伏乞

皇上聖鑒訓示謹

奏 道光二十八年五月十二日具

奏奉

硃批另有旨欽此內閣奉

上諭李星沅奏升任參將應請扣除引見一摺江蘇升

任吳淞營參將陳長泰前在蘇松鎮標中營遊擊任
內有借欠崇明縣庫銀八千餘兩據稱墊用巡洋燈
燭等款此等用項所需無幾各營例有公費何以輒
行借墊且閱時三十餘年厯任交代何以並不清釐
恐有侵漁入已捏款流攤情弊必應澈底查明嚴行
參辦該員陳長泰現在督押海運米船北上著卽扣
除赴部引見海運事竣由直隸山東督撫催令迅卽
回營交該督飭司核實秉公認真查辦毋許稍有不

實不盡該部知道欽此

應修卡房箭廳估需銀款摺子

奏爲縣營應修卡房演武箭廳等工估需銀款循例
具奏仰祈

聖鑒事竊照地方一切工程前奉

諭旨暫行停止其營汛卡房演武廳等項爲兵丁棲巡
操演要地仍准興辦茲據江甯布政使傅繩勛詳
稱上元縣西華門等七汛卡房已滿固限坍損應
修又佃湖營教場演武廳等工自建設後未經修

過現已坍塌委據江甯府管糧同知及淮安府知府分詣查勘均係必不可緩之工又據安徽布政使蔣文慶詳稱安慶營右軍守備署內演武箭廳又安徽撫標右營遊擊署內箭廳均逾固限坍塌應修委據懷甯縣知縣暨安慶府知府等分詣勘明由各縣營按例確估實需工料銀二千二百三十八兩八錢七分五釐請循例於司庫耗羨銀內動給興修詳請具

奏前來臣查各縣營卡房演武前廳等項爲兵丁棲
巡操演要地茲因年久傾圯前修固限已逾旣據
委員勘實結報自應准其分別修理所有估需銀
兩仰懇

聖恩俯准在於司庫耗羨銀內動支給辦除將送到勘
結隨案咨部飭造估計冊結照例詳辦外所有請
修各工查明上屆修造年分及估計銀數另繕清
單恭呈

御覽理合循例恭摺具

奏伏乞

皇上聖鑒敕部核覆施行謹

奏 道光二十八年五月十二日具

奏奉

硃批工部議奏單併發欽此